

MARKA A CIAPAW THAWNGCHAWBIA

*Baptisma peitu Johan tah langpui a parai
(Mk 3:1-12; Luk 3:1-18; Jh 1:19-28)*

¹ Khazing Sawcapaw Zisu Khri a kong thawngchawbia ahrangthonah cawh ma heh a cang.

² Khazing khuavang Isaiah cabu letei ciapaw cawh,

“Ka tlang y paw cawh na hmelang ka taw a,
taico Ama taco na langpui a parai a. ☆

³ Raangcaa letei a y leimeipaw o taco,

‘Abuipaw cawtah langpui cawh parai la, a
cawtah langpui cawh pading pah my lo,’ a
tah,” ☆

tatah a tah. ⁴ Taico Johan cawh va chuh ka,
sua ngethainah cawtah angepachihnah baptisma
kong phungrei ka, raangcaa lekhei baptisma a
cangsah he. ⁵ Taico Judia raang letei vytei le,

Jerusalem khuapui letei ming vytei cawh piathlah
he ka, Ama khatah sei he ka, aa suanah phy he
ka, Jordan tuivaw letah baptisma a cangsah he.

⁶ Johan cawh sahisy hming tah tawpaw caise a tua
ka, saving tesong a te letah a song ka, khybawh le
akhui tui a e. ⁷ Taico Johan taco, “Ka hninglang

tah kama navy tah a rungnaw vypaw a va sei a.
Kama cawh a bung tah a phepakong rui a thlang
tlangpaw hmai cang bei neh. ⁸ Kama taco tui tah
baptisma ca cangsá he neh ka, canghrasala, Ama

duitei taco Thlawpaw Pathai tah baptisma a ca cangsá he a,” tatah a tah he.

Zisu baptisma a cangnah le tuhsonah

(Mt 3:13-17; 4:1-11; Luk 3:21-22; 4:1-13)

⁹ Ma ningcai leco Zisu cawh Galili raang, Nazaret khua taitah va sei ka, Jordan tuivaw letah Johan tah baptisma a cangsah. ¹⁰ Tui taitah a ka pia cangkawleh avai a hong ka, Thlawpaw cawh za cung ka, thury hratah a cung letah a cawngpaw khah a hmuh. ¹¹ Taico, avai taitah, “Nama cawh ka dopaw ka Sawcapaw na cang. Na cung letah ka lung a lawng ngetei,” tatah o a za ring.

¹² Ma khy cangkawleh leco, Thlawpaw tah Ama cawh raangcaapaw lang seisah ka, ¹³ ma raang-caapaw leco ning songli chung ung ka, Setan tah a tuhso. Ama cawh saraang sahlo khatah ung ka, vaiming sahlo tah aa mingkai.

A hningzuitu hmetawpaw sahlo ynah

(Mt 4:12-22; Luk 4:14-15; 5:1-11)

¹⁴ Johan thong a tlah khy taikhei, Zisu cawh Galili raang lang sei ka, Khazing thawngchawbia cawh a y khui. ¹⁵ “Cai le ning a tling myca, Khazing painah raang cawh a ne myca ka, a ngepachih la, thawngchawbia heh zing myca law,” tatah a tah.

¹⁶ Zisu cawh Galili rili ngaekang letah a cahrong ning takhei, ngawtletu a cangpaw he Simon le a unypaw Andru cawh aso aa va leimeipaw khah a hmuh he. ¹⁷ Zisu tah aaning cawh, “A vong la, pa zui o, cawngsaw a tletu tah ka ca tua he a,” tatah a tah he. ¹⁸ Ma cangkaw leco aa so sahlo cawh seisai he ka, Zisu cawh aa zui.

¹⁹ A cawngpe va sei he ka, aa so sahlo khah a thei leimeipaw he Zebedi sawcapaw Jeims le a unypaw Johan khah tuilawng chung letah a hmuh he. ²⁰ A hmuh cangkaw he leh aaning cawh y he ka, aa paw Zebedi cawh a hlofapaw sahlo khakhei tuilawng letah seisai he ka, Zisu cawh aa zui.

*Zisu tah thlawpaw a chaw lypaw a tingchua
(Luk 4:31-37)*

²¹ Zisu le a hningzuitu sahlo cawh Kapernaum khua lang sei he ka, Sabat* ning a va phah tihtah Zisu cawh synagog† lang a nae ka, a cawngpah he. ²² A cawngpahnah cawh aa ning a ang ngetei, zecawtamaw tatah phungbia cawngpahtu sahlo hratah cang lytah nawhnuitu hratah a cawngpah caw he tah a cang. ²³ Ma cai leco, synagog leco thlawpaw pialuipaw tei a tlepaw cawngsaw pakheh ung ka, ²⁴ “Nazaret Zisu, kaaning khahei zemaw na du, kaaning hlyde ruapaw tamaw na vong? Nama cawh ahomaw na cang tahpaw ka hni. Khazing Mehpathai na cang,” tatah a y.

²⁵ Zisu tah, “De teitah ung! A chung taikhei ka pia!,” tatah a hrangso. ²⁶ Thlawpaw pialuipaw tah ma cawngsawpaw cawh a sah pui tah cathing ka, a ysang hmotah a piathlah.

²⁷ Cawngsaw vytei cawh aa ningang ngetei ka, “Ma heh zemaw a cang? Nawhnuinah chitah a cangpaw cawngpahnah a thapaw heh! Thlawpaw pialuipaw zong naw pei he ka, a bia aa nge thlang!” tatah pakheh le pakheh aa tah he.

* **1:21** Sabat cawh, Juda cawngsaw sahlo a hianah ning,a cang.

† **1:21** Synagog cawh, Juda sahlo behnah ing,a cang.

²⁸ Galili raang chung a kawkih letah Zisu kong thongpang cawh a thang thlu palang.

*Zisu tah cawngsaw hlupui a dangsah he
(Mt 8:14-17; Luk 4:38-41)*

²⁹ Synagog taitah aa piathlah cangkaw tei leh Jeims le Johan khatah Simon le Andru aa ing lang aa sei. ³⁰ Simon a nupuino a no cawh asaw tah nang ka, lakhing letah a ih thlang ka, a konglang cawh Zisu khah aa ching. ³¹ Macawtaco ama khakhei a vaw ka, a kih khah tle ka, a patho. Taico, a sawnah taco thlaw ka, aaning sahlo cawh a tangtui he.

³² Zailang ning a tlah khy taico a sahpaw vytei le khachia tei a tlepaw sahlo cawh Ama khatah aa va chua khui he. ³³ Khua pungpaluh co ingkaw letah a pahmo he ka, ³⁴ taico Zisu tah asawnah a phing-phing a hnuipaw mehlupui cawh a dangsah he. Khachia a hlupui zong papia he ka, canghrasala khachia sahlo taco Ama khah ahomaw a cang tahpaw aa hni cawtah khei aa reithlawpaw khah sai bei he.

A kingdangnah hming letah Zisu thlaw a chang

³⁵ Mongdi khua hme a se hlai letah Zisu cawh tho ka, a kingdangnah lang sei ka, ma leco thlaw a chang. ³⁶ Simon le a vesaw sahlo taco, Ama cawh hui pawtah sei he ka, ³⁷ Ama cawh aa va hmuh tihtah, “Cawngsaw maikaw tah aa ca huilai leime kho,” tatah aa tah.

³⁸ Zisu taco aaning cawh, “Ma kaekang lehei a ungpaw khua hringpaw sahlo letah zong phung ka rei khy nápawtah ma lang cawh sei he peh. Ma rawng taco ka vongpaw a cang,” tatah a tah he.

³⁹ Mataico Galili raang chung vytei cahrong ka, synagog sahlo letah phungrei lai ka, khachia zong a papia lai he.

Thinghmuihri a ingpaw

(Mt 8:1-4; Luk 5:12-16)

⁴⁰ Zisu khatah thinghmuihri a ingpaw cawng-saw pakheh cawh a vong ka, a khuh panai ka, “Na du caco na pa dangsah khy se,” tatah ningdo a hae.

⁴¹ Zisu tah ma cawngsawpaw cawh lung a saw ngetei ka, a kia tah pazah ka, va tong ka, “Nama na dang cawh du neh ka, dang myca,” tatah a tah.

⁴² Sung sungkheh tah a thinghmuihri vytei cawh ly ka, a dang.

⁴³ Zisu tah a sah pui tah raering pei ka, a seisah tlamang. ⁴⁴ Zisu tah, “Ahohmai ching khe lo, ma duitei cawh tlangbui a va mingsah la, na dang my ca cawtah khei Moses phungbia hrakhei thuih-lainah va tua la, ma pawsui co dangsah na cang-paw khah ming maikaw tah aa ca hni a,” tatah bia a patai. ⁴⁵ Canghrasala, ma cawngsaw cawh sei ka, ma thongpang cawh reilai ka, a kaipazasah thlu. Macawtaco a seinah maikaw letah ma kong cawh reilai ka, a kaipazasah cawtah Zisu cawh langhai tah khuachung lang a nae khawh lytah a kingdangnah lekhei a ung hri. Canghrasala, kawting taiteipaw mehlupui khah Ama khatah a vong thly thly he.

2

Zisu tah a songbepaw a dangsah

(Mt 9:1-8; Luk 5:17-26)

¹ Ma khy ning a cawngpe letaco, Zisu cawh Kapernaum khua lang a nae kaw tihtah zaw-pui takhei ing lang a va tlung kaw tahpaw khah aa thui. ² Maco ingkaw hrang letah hmai ung nápw a ung lynah tai cawngsaw cawh chuh caimang he ka, aaning sahlo cawh thawngchaw-bia a cawngpah he. ³ Mehthaikheh va chuh he ka, a songbepaw pakheh papali tah aa va puh lai. ⁴ Cawngsaw aa hlu tu cawtah Zisu kung phah khui khy lytah Zisu a ungnah dihdong ingcung lang kekhuí he ka, ingcung cawh ky thlah he ka, aphia letah a ih thlangpaw meh dang lypaw cawh aa za thlah. ⁵ Zisu tah aa zingnah khah a hmuh tihtah a songbepaw cawh, “Ka dua, na suanah vytei cawh ngethai a cang,” tatah a tah.

⁶ Ma letei a ty thlangpaw he phungbia cawng-pahtu thaikheh taco aa lungchung tah, ⁷ “Ma cawngsaw heh zecawtamaw, ma hraco a tah thlang? Khazing a reipachia! Khazing tah ly co ahomaw suanah a ngethai khy?” tatah aa tah.

⁸ Ma cangkawleh cawh zemaw aa pacang tah-paw khah Zisu tah a lungthing tah hnih ka, “Zecawtamaw ma hming sahlo heh naa pacang?

⁹ Ma a songbepaw khahei, ‘Na suanah sahlo cawh ngethai a cang,’ tahpaw maw a neh vy maw, ‘Tho la, na iphaw a lah la, sei,’ tahpaw maw a neh vy? ¹⁰ Canghrasala, Cawngsaw Sawcapaw heh aluicung lehei sua ngethai khynah naw a hnui taheh ka ca hmuh sá he a,” a tah he. Taico, a songbepaw cawh, ¹¹ “Tho la, na iphaw a lah la, ing lang a dih,” tatah a tah. ¹² Ma cawngsawpaw cawh tho ka, a iphaw khah a lah ka, aa zongmingtei mehmuh leco piathlah ka a sei. Ma hming taco

ming maikaw aa ningangsah he ka, Khazing cawh aa reithai. “Ma hapaw hming heh kaa hmuh bang tlung be!” aa tah.

Levi ynah

(Mt 9:9-13; Luk 5:27-32)

¹³ Zisu cawh Galili tuiping ngaekang lang khah va sei kaw ka, ma leco cawngsaw hlupui tah va pange he ka, a cawngpah he. ¹⁴ A seipai tah Alfas a sawcapaw Levi cawh ngungkhui kheinah hming letah a typaw khah hmuh ka, Zisu taco, “Va pa zui,” tatah tah ka, taico Levi cawh tho ka, Ama cawh a zui.

¹⁵ Zisu cawh Levi ing letah zairia batui a e leimeining takhei, ngungkhui a kheitu mehlupui le ahringpaw mehsua sahlo cawh Ama le a hn-ingzuitu sahlo khatah batui aa e hrui. Ama a zuipaw sahlo cawh a hlu ngetei he. ¹⁶ Phungbia cawngpahtu Farasi sahlo tah mehsua sahlo le, ngungkhui a kheitu sahlo khatei batui a e hruipaw khah aa hmuh tihtah a hningzuitu sahlo khah, “Zecawtamaw, mehsua sahlo le ngungkhui a kheitu sahlo khatah batui a e hrui?” tatah aa hae he.

¹⁷ Zisu tah ma cawh thui ka, “A dang thlangpaw taco sibui aa hia tlung be, a dang lypaw tah pui aa hia. Mehding y rua pawtah ka vong tlung be, mehsua sahlo y rua pawtah ka vong hri hi,” a tah he.

Batui cahenah kong Zisu bia aa hae

(Mt 9:14-17; Luk 5:33-39)

¹⁸ Baptisma peitu Johan hningzuitu sahlo le Farasi sahlo cawh batui a cahe he. Cawngsaw thaikheh a vong he ka, Zisu cawh, “Zecawtamaw

baptisma peitu Johan hningzuitu sahlo le Farasi phunglang a zuipaw sahlo cawh batui cahe he ka, canghrasala nama na hningzuitu sahlo cawh batui cahe lytah aa ung?” tatah bia aa hae.

¹⁹ Zisu taco, “Sawngpaw sahlo cawh nupui a chuipaw satlepaw khatah aa ung chung taco batui a cahe tei he maw? Aaning khatah a ung thlang chung cawh batui a cahe tei bei he.

²⁰ Canghrasala, nupui a chuipaw satlepaw cawh aaning taitah lahnah cai a phah tae a. Ma ning taico batui aa cahe tae thlang a.

²¹ Ahotahmai tah paithang a thapaw tah chaichi a paringpaw khah a beithlah bang bei he. Ma hrarei aa tua caco, paithang a thapaw khah hruipako a ka, a caipaw paithang khah a dochy tima a. ²² Ahotahmai tah misurhang a hringtui khah sapho tuithei a paringpaw letah rai bang bei he. Aa rai caco, misurhang ka tho a ka, sapho tuithei khah tingchy a ka, misurhang kha, sapho tuithei zong a rawh thlu he a. Ma co cang lytah misurhang a hringtui cawh sapho tuithei a thapaw letah a rai hri a,” tatah a tah he.

Sabat Buipaw

(Mt 12:1-8; Luk 6:1-5)

²³ Sabat ningkhehpaw letah Zisu cawh a hningzuitu sahlo khatah saze lui chung tah sei he ka, aa seipai khei a hningzuitu sahlo taco saangsu cawh aa pahrih pai lai. ²⁴ Farasi sahlo tah Zisu cawh, “Mingtua, zecawtamaw Sabat ning letah tua phung a cang lypaw heh aa tua?” tatah aa tah.

²⁵ Zisu taco, “David tei a vesaw sahlo khatah aa ngaidi ngetei ning le epaw aa hia ning tei a

tuapaw khah rei bang bei he ceh maw? ²⁶ Abiatha tlangbui alaicaipaw a hrening cai lekhei Khazing behnah ing lang a nae ka, tlangbui sahlo tah ly co ahotahmai e phung a cang lypaw, Khazing aa dangnah very khah a e. Taico a chy khah a vesaw sahlo zong a peh hrah he kho,” tatah a chai he.

²⁷ Mataico Zisu tah aa hai letah, “Sabat ning cawh cawngsaw chahnah cawtah tuapaw cang ka, cawngsaw heh Sabat ning cawtah tuapaw cang be. ²⁸ Macawtaco Cawngsaw Sawcapaw heh Sabat Buipaw a cang,” a tah he.

3

¹ Ning hringpaw letah Zisu cawh synagog lang khah va sei kaw ka, ma leco a kih a songpaw pakheh a za ung thlang. ² Mehthaikheh taco Zisu cawh sua aa pu khy napawtah a bo he ka, macawtaco Sabat ning tah ma cawngsawpaw cawh a dangsah maw dangsah ly takhah aa ngia thlang. ³ Zisu tah a kih a songpaw cawh, “Ming vytei hme lehei a daw tua,” tatah a tah.

⁴ Mataico aaning sahlo khah, “Sabat ning tahei chahnah tua maw a phung a cang, chahlynah maw? Hringnah pachah heh maw a phung a cang, thaw heh maw?” tatah a hae hri he. Canghrasala zehmai palei bei he.

⁵ Zisu taco a thingae hmotah aaning cawh ming he ka, aa lungku a chaw tu cawtah a ngechia ka, cawngsawpaw cawh, “Na kih pathlang,” a tah. A kih cawh pathlang ka, a dang. ⁶ Mataico, Farasi sahlo cawh piahly he ka, Zisu cawh zekhatamaw kaa thaw khy a tahpaw khah Herod a hningzuitu sahlo khakhei aa reisia.

Mingzawpui tah Zisu aa zui

⁷ Zisu cawh a hningzuitu sahlo khatah tuiping lang sei kaw he ka, Galili taikhei cawngsaw rung-pui tah aa zui. ⁸ Zisu tei a tuapaw vytei khah aa thui tihtah Judia raang, Jerusalem khuapui, Idumia raang, Jordan tuivaw rae lang raang le Tair le Sidon khua kaekang letei a ungpaw khua sahlo taikhei cawngsaw hlupui Ama khatah a vong he. ⁹ Cawngsaw aa hlutunah cawtah aa pa pahlong tu sua a tah ka, a hningzuitu sahlo khah a cawtah tuilawng achiapaw khah ting cia tah pa pachia-pah thlang my lo a tah he. ¹⁰ Zecawtamaw tatah mehnung hlupui khah dangsah he ka, a sahpaw maikaw tah Ama khah tong pawtah hmelang a nang he. ¹¹ Thlawpaw pialuipaw sahlo tei aa tlepaw sahlo maikaw tah Ama cawh aa hmuh tihtah a hmekaw letah pohly he ka, “Khazing Sawcapaw na cang,” tatah a y he. ¹² Canghrasala aaning sahlo cawh Ama khah ahomaw a cang tahpaw khah reily pawtah cyky tah bia a patai he.

Apostol pahrawhluihning a thing he (Mt 10:1-4; Luk 6:12-16)

¹³ Zisu cawh tlaang cunglang ke ka, Ama khatah a y dupaw sahlo khah y he ka, Ama khaco a vong he. ¹⁴ Aaning chung taico pahrawhluihning khah thing he ka, ma sahlo cawh, “Apostol sahlo,” tatah ming a sah he. Aaning cawh Ama khatah ung a pawtah le, phung rei tah taw a pawtah le, ¹⁵ khachia sahlo papianah naw aa hnui a pawtah a thingpaw he a cang. ¹⁶ A thingpaw pahrawhluihning cawh ma sahlo heh a cang he. Piter tatei ming a sahpaw Simon, ¹⁷ Zebedi sawcapaw

Jeims le Johan (Boanazi a tah he, a silang cawh khalung sawtei sahlo tahnah a cang), ¹⁸ Andru, Filip, Barthalomeo, Mathai, Thomas, Alfas a saw-capaw Jeims, Thadia, ci le phing a dawkhui paw Simon le, ¹⁹ Ama a luitupaw Judas Iskariot a cang he.

Zisu le Belzabub

(Mt 12:22-32; Luk 11:14-23; 12:10)

²⁰ Mataico, Zisu cawh ing lang a nae ka, cawng-saw tah aa pahlong thlangnah cawtah khei Ama le a hningzuitu sahlo cawh batui hmai e thai bei he. ²¹ A sawny tah ma kong cawh aa thui tihtah, “A thinglung a hmang khawh beh,” tah he ka, ama lah a pawtah a sei he.

²² Phungbia cawngpahtu thaikheh, Jerusalem taitah a va chuhpaw sahlo taco, “A chung letah Belzabub a hrei ka, ma khachia sahlo buipaw thongtah khachia sahlo a papia khy he,” tatah aa tah.

²³ Maco Zisu tah aaning sahlo cawh y he ka, tawchingnah bia tei a chingpaw he cawh, “Zekhatamaw Setan taco Setan lilaw cawh a papia thai a? ²⁴ Painah raang raangkheh cawh ama le ama lilaw a dy caco, ma painah raang cawh zekhatamaw a bing khy a? ²⁵ Ingchungkho khokheh cawh a rai ly tei a chaichy caco, ma ingchungkho cawh a bing khy a be. ²⁶ Ma hraco Setan zong ama le ama a dy tei a chaichy caco, a daw khy a be, a lydenah cai a chuh hri a. ²⁷ Hmuisui tei co, meh thawtlungpaw khah tongchai taw lytah a ing chunglang a nae tah a hnuicho cawh ahomaw a lah pah khy a? A tongchai khy taitah longlong a lah khy a. ²⁸ Cawngsaw heh aa suanah vytei le

Khazing aa reipachianah vytei khah cawh ngethai a cang he a tahpaw biahmuisui ka ca ching he.
²⁹ Canghrasala Thlawpaw Pathai a reipachiapaw duitei cawh ahohmai ngethai cang by bei he. Ama cawh chaizaw suanah a tuapaw a cang,” a tah he.

³⁰ Ma bia heh, “Thlawpaw pialuipaw a chung letah a hrei,” tatei aa tah cawtah a reipaw a cang.

Zisu a no le a uny sahlo

(Mt 12:46-50; Luk 8:19-21)

³¹ Mataico, Zisu a no le a uny sahlo cawh va chuh he ka, khunglai lang letah a daw thlang he ka, cawngsaw taw he ka, Zisu khah aa za ysah.

³² Cawngsaw hlupui tah a ty cadung thlang he ka, a hai letah, “Na no le na uny sahlo tah nama ca hui he ka, alailang letah aa ung thlang he,” tatah aa tah.

³³ Zisu taco, “Ahomaw ka no le ka uny sahlo cawh a cang he?” tatah a hae he.

³⁴ Mataico a kae letei a ty cadung thlangpaw sahlo cawh ming he ka, “Ma lehei ka no le ka uny sahlo cawh a ung thlang he hi! ³⁵ Ahohmai Khazing dunah a tuapaw cawh ka uny, ka satei le ka no a cang he,” tatah a tah.

4

Thleci a va tupaw tawchingnah bia

(Mt 13:1-23; Luk 8:4-15)

¹ Ma khy taico ning hringpaw leco Zisu tah Galili tuiping kae lekhei a cawngpah he. Ama a pahmo sopaw cawngsaw khah aa hlutunah cawtah tuilawng chunglang a nae ka, a ty ka, tuili lang a seisah. Ma chung vytei cawh zawpuipaw

khah ngaekang letah a ung thlang he. ² Hming hlupui khah tawchingnah bia tah cawngpah he ka, tawchingnah bia sangkheh a chingpaw he cawh, ³ “Ngetua hmai o! Ly a tuapaw pakheh cawh thleci va pawtah ly lang a sei. ⁴ Thleci a va leimeining takhei a chy cawh lang kae letah tlah ka, pavaw sahlo tah a va zy he ka, aa khi thlu thah he. ⁵ A chy cawh alui apawnah lungda letah tlah he ka, alui a pawnah cawtah sungkheh teitah a ka cy he. ⁶ Canghrasala ning va tha ka, a ai tih he tah thahrang aa thlah lynah cawtah a ro palang thah he. ⁷ A chy cawh ahling hrong letah tlah he ka, ahling cawh ka chang ka, a diseh thlu caw he tah saze vui bei he. ⁸ Canghrasala a chy cawh alui a chahnah letah aa tlah. Ka cy he ka, ka chang he ka, a zaw tihtah a saze cawh a leh songthung, a leh songruh, a leh zakhé tahmai a vui,” a tah he.

⁹ Taico, Zisu tah aa hai letah, “Thuinah nawkho a hnuipaw taco ma bia heh thui he seh,” tatah a tah.

¹⁰ Ma khy taico Zisu cawh Ama teitah a ungning takhei apostol pahrawhluihning le a kaekang letei a pahmopaw ahringpaw cawngsaw sahlo takhei tawchingnah bia a silang khah aa hae. ¹¹ Zisu tah, “Naaning cawh Khazing painah raang bia-paruh hni khynah khah peh na cang thah he ceh. Canghrasala, alailang tei a ungpaw sahlo duitei cawh zezong khah tawchingnah bia tah ching a cang he. ¹² Macawtaco,

‘A ming cawh aa ming leimei thlang a, canghrasala hmuh by a bei he.

Aa naw tah aa thui leimei thlang a, canghrasala hnih thai hlui a bei he.

Ma hratei a cang ly caco Khazing lang a paleh kaw sua he seh la, ngethai tah a ung pang he a, ☆ tatah Capathai tah a tah,” tatah a tah.

¹³ Taico Zisu tah aa hai letah, “Ma tawchingnah bia heh hnih thai bei he ceh maw? Ma heh hmai naa hni ly caco zekhatamaw tawchingnah ahringpaw sahlo cawh naa hni thai a? ¹⁴ Ly a tuapaw tei a vapaw thleci cawh Khazing bia heh a cang. ¹⁵ Meh thaikheh cawh lang letei a tlahpaw thleci sahlo khatah a lo he. Bia khah aa thui cangkawleh Setan cawh a vong ka, aa chung letei vapaw bia cawh a lah pah thah he. ¹⁶ Ahringpaw cawh lungda cung letei a tlahpaw thleci sahlo khatah a lo he. Khazing bia aa thui cangkawleh lunglawng teitah aa cyhlang. ¹⁷ Canghrasala, thahrang aa thlah lynah cawtah khua sy parui bei he. Khazing bia rawng tah ruhanah le hrehnah a chua tihtah a pohly palang he. ¹⁸ Ahringpaw meh thaikheh cawh ahling hrong letei a tlahpaw thleci khatah a lo he. Khazing bia cawh aa thui thlang, ¹⁹ canghrasala, khazaw lung reithuinah le hnuirung dunah le a hringhrepaw dunah vytei tah thawngchawbia khah pazai thah ka, a thui thuisah khy be. ²⁰ Canghrasala ahringpaw cawng-saw thaikheh cawh alui a chahnah letei a tlahpaw thleci khatah a lo he. Khazing bia cawh thui he ka, cyhlang he ka, thuisu cawh a leh songthung, a leh songruh a leh zakheh tai hmai a vui he,” tatah a tah.

Me-ing tung letei me-ing
(Luk 8:16-18)

²¹ Zisu taco aa hai letah, “Me-ing cawh tongbai rai letah cang seh, lakhing rai letah cang seh aa chia tei maw? Me-ing tung letah chia bei he ceh maw? ²² No thlangpaw hming vytei cawh palang thlu cang a he ka, bakhupaw hming vytei cawh a langhai tah chuakhui a cang he a. ²³ Thuinah nawkho a hnuipaw maikaw tah ma bia heh thui he seh,” tatah a tah.

²⁴ A rei vypaw cawh, “Naa thuipaw khah a chaw teitah pacang my lo! Naa hmangpaw neh ná kheh neh kaw cang he ceh ka, alai vy tahmai a ca neh he a. ²⁵ A hnuipaw cawh peh vy cang a ka, a hnui lypaw cawh a hnuitlakangpaw tei hmai khah lah pah a cang a,” tatah a tah he.

Thleci a chang leimeipaw tawchingnah bia

²⁶ Zisu tah, “Khazing painah raang cawh cawng-saw pakheh tei a ly letah thleci a vapaw hratah a cang. ²⁷ Ching le zai, a i tah cang seh, a hraw tah cang seh, thleci cawh ama teitah ka cy ka, ka chang ka, canghrasala, zekhatamaw a cang tahpaw hnih be. ²⁸ Alui tah ama teitah saze a chuasah. A hmetaw tah a kung, a pazui tah a thuisu, taico achang tatah a chuasah he. ²⁹ Hre a zaw cangkawleh saw cawh a lah ka, a aw he,” tatah a tah.

Aihrang ci tawchingnah bia

(Mt 13:31,32, 34-35; Luk 13:18-19)

³⁰ Zisu tah a rei vypaw bia cawh, “Khazing painah raang cawh zekhatamaw a lo? Zekhatamaw kaa tawching a? ³¹ Alui letei cingpaw thleci vytei letah a chia caipaw aihrang ci khatah a lopaw a cang. ³² Alui letah ling he ka, a ka

chang tih taco buichung thleci hrong letah a kung alaicaipaw tah a ka tua. A caibai zong alaipaw pui a cangnah cawtah pavaw zong tah a ningde letah a cawng tei he,” tatah a tah he.

³³ Ma hapaw tawchingnah bia khah Zisu tah hmang ka, aa hnithai khynah zé tah Khazing bia khah a cawngpah he. ³⁴ Tawchingnah bia hmang lytah aaning sahlo cawh cawngpah bang bei he. Canghrasala a hningzuitu sahlo khatah aaning teitah aa ungning tah zezong a chingpase kaw tei he.

*Zisu tah thlichia a desah
(Mt 8:23-27; Luk 8:22-25)*

³⁵ Ma ning zailang leco, Zisu tah a hningzuitu sahlo cawh, “Raechai lang sei he peh,” tatah a tah he. ³⁶ Zawpui cawh seisai he ka, Ama a ungnahtuilaung khei aa seikhui. Ma leco tuilaung hringpaw zong a ung hrah he. ³⁷ Thlichia cawh a hrang caimang ka, tuileh cawh tuilaung chunglang tai a nae pai leimeinah cawtah tuilaung cawh tui lang a phung daimang. ³⁸ Zisu cawh tuilaung a lei lang lekhei ung ka, a tynah dyching lekhei a ihning thlang. A hningzuitu sahlo taco va patho he ka, “Cawngpahtu tui lang kaa tlápaw heh na ze a ca pui bei maw?” tatah aa tah.

³⁹ Zisu cawh ka tho ka, thli cawh a hrangso. Taico, tuileh cawh, “De! A cali!” a tah. Mataico, thli cawh de ka, tuileh cawh a cali he.

⁴⁰ Taico, Ama taco a hningzuitu sahlo cawh, “Zecawtamaw ma reiro co naa ci? Zingnah hnui ting bei he ceh maw?” tatah a tah he.

⁴¹ A hningzuitu sahlo cawh ci ngetei he ka, “Ma heh zehapaw cawngsaw maw a cang? Thli le

tuileh tahmai a bia aa nge thlangpaw heh!” tatah aaning le aaning cawh aa tah he.

5

Khachia tei a tlepaw dangsahnah
(Mt 8:28-34; Luk 8:26-39)

¹ Zisu le a hningzuitu sahlo cawh tuiping cawh cakah he ka, Gerasin raang khah aa va phah. ² Zisu cawh tuilawng taitah a cungthlah ning takhei thlawpaw pialuipaw tei a tlepaw cawngsawpaw tah ama khah a tawng pawtah thlaikung taikhei a va sei. ³ Ma cawngsawpaw cawh thlaikung letei a ung teipaw cang ka, ahotahmai tah hraipaking tah bahrairui tahmai tongchai khy bei he. ⁴ Zemaw tah pawco a kih le a phe khah uihlupui tongchai he ka, canghrasala bahrairui khah chehchung thlu ka, a phe letei thawrui sahlo zong khah a phongchung thlu he. Ahotahmai tah ama cawh tle pakhih khy bei he. ⁵ Ching le zai, thlaikung letah le a kaekang tlaang vytei leco a khiakaly ka, ysang ka, ama le ama cawh alung tah a aw tei.

⁶ Langhlaw pui taitah Zisu cawh a va hmuh tih-tah va saihno ka, a hmekaw letaco a khuh a panai. ⁷ “Cungnungcai Khazing Sawcapaw, Zisu, kama khatah zemaw na dupaw a ung? Pa hreh haitei kheh tatah Khazing ming tah ka ca naw,” tatah a thang khy chung tah a y. ⁸ Zemaw tah pawco Zisu tah ama khah, “Nama thlawpaw pialuipaw, ma cawngsawpaw a chung taikhei piathlah,” tatah a tah thah cawtah a cang.

⁹ Mataico Zisu tah, “Na ming ahomaw?” tatah a hae.

Ma cawngsawpaw taco, “Kaa hlu ngeteinah cawtah ka ming cawh Thongzakheh a cang,” tatah a palei. ¹⁰ Taico, ma raang chung taico a pialuipaw thlawpaw sahlo cawh papia ly rua pawtah Zisu cawh a naw canei leimei thlang.

¹¹ Aa kae tlaangpa lekhei lawh a e leimeipaw voh rungpuui a ung he. ¹² Khachia sahlo taco Zisu cawh, “Voh rung lang ma seisah la, aa chunglang a ma naesah thlang,” tatah aa naw. ¹³ Aaning cawh seinah naw pei he ka, thlawpaw pialuipaw sahlo cawh piathlah he ka, voh chunglang cawh a nae he. Thonghning hrawng a cangpaw voh rungpuui cawh lungkang cung taitah tuiping lang khah a zythlah he ka, a thi thlu he.

¹⁴ Voh a mingkaitu sahlo cawh sai tlamang he ka, ma konglang cawh khuapui le khuatei vytei khah va thuisah he ka, ma hratei hming a cangpaw cawh ming rua pawtah ming hlupui khah a va chuh he. ¹⁵ Zisu kung aa va tlung tihtah thlawpaw a pialuipaw sahlo bupui tei aa tlepaw cawngsawpaw khah chaichi a tua ka, lungsing teitah ama khatah a za tythlangpaw khah aa hmuh tih-tah aa ci ngetei. ¹⁶ Thlawpaw a pialuipaw sahlo tei aa tlepaw cawngsawpaw le voh sahlo cung letei hming a tlungpaw khah a hmuhpaw sahlo taco, a cangnah kong cawh zawpuui khah aa ching he. ¹⁷ Mataico Zisu cawh aa raang taitah piathlah a pawtah aa naw.

¹⁸ Zisu cawh tuilawng chunglang khah a nae ning takhei khachia tei a tlepaw cawngsawpaw taco, “Nama khatah ka seilai hrá a,” tatah a naw. ¹⁹ Canghrasala Zisu tah sai be. “Ma navy co na ing lang va sei la, Abuipaw tei ningdo a ca tah zia le

na cung letei hming rungnawpaw a tuapaw khah na sawny va ching he,” tatah a tah. ²⁰ Macawtaco ma cawngsawpaw cawh sei ka, Dekapoli raang lekhei Zisu tah zetlua tamaw a cawtah hming a tuapah takhah ching longmang he ka, cawngsaw vytei cawh aa khuarawh a haa ngetei.

*Laisawtha a thipaw le mehdang ly canu
(Mt 9:18-26; Luk 8:40-56)*

²¹ Zisu cawh tuilawng tah raechai lang cawh va sei kaw hui ka, tuili raechai lang letah a ung thlangning taco, cawngsaw hlupui tah aa pahlong thlang. ²² Ma ning taco, synagog a uhtu pakheh a cangpaw Jaira cawh a vong ka, Zisu kung a va phah tihtah a phe hrang letah a bawh ka, ²³ “Ka sawcanu a thi daimang. Ningdo pawtei tah a vong la, a cung letah na kih pahnia la, ma tei na tua caco dang kaw a ka, a hring kaw thlang a,” tatah a sah pui tah a naw. ²⁴ Macawtaco Zisu cawh Jaira khaco sei ka, cawngsaw hlupui tah zui he ka, Ama cawh aa pahlong thlang.

²⁵ Ma leco, canu pakheh kung hrawhluihning chung a thi a chuh no a ung. ²⁶ Sibui a hlupui tah mingkai he ka, a taithui ngetei. A hnuicho vytei pachang thlu ka, dang vy hlui lytah a pazua vy lo leime. ²⁷ Zisu thong a thui tihtah zawpui hrong leco a hninglang tah a vong ka, a chaichi dong cawh a va tong, ²⁸ zecawtamaw tatah, “A chaichi chang ka tong khy caco ka dang a,” tahpaw a rawh cawtah a cang. ²⁹ Ma cangkaw leco a thi cawh kih thah ka, ka sawnah taitah ka dang myca tahpaw khah a hni.

³⁰ Cawngsawno tah a va tong cangkawleh cawh Zisu tah a chung taitah hmingtuakhynah a piapaw khah a hni. Zawpui lang cawh a hui ka, “Ahomaw ka chaichi a pa tong?” tatah a tah he.

³¹ A hningzuitu sahlo taco Zisu cawh, “Cawng-saw hlupui tah aa ca nuapaw khah na hmuh thlang heh saw, zekhatah zia tamaw, ‘Ahomaw a pa tong?’ na tah thlang!” tatah aa tah.

³² Canghrasala Zisu cawh a chaichi a tongpaw khah ahomaw a cang takhah zawpui hrong lekhei a ming lai. ³³ Taico ma cawngsawno taco, a cung letei hming a tlungpaw khah a hninah cawtah ci ka, a cathing hmotah a phehrang letah a va bawh ka, a cangnah vytei cawh a ching thlu. ³⁴ Zisu taco, “Ka sawcanu, na zingnah tah a ca dangsah. De teitah va seí la, na sawnah taco ca thlaw myca seh,” tatah a tah.

³⁵ Zisu tah bia a rei leimeining taco, synagog a uhtu Jaira ing taico meh thaikheh a vong he ka, “Na sawcanu cawh a thih thah, cawngpahtu khah hnahnawh ruapaw cang khawh be,” tatah aa ching.

³⁶ Zisu tah aa reipaw cawh a thuisah du lytah ung ka, Jaira hai leco, “Na thlawzawng kheh seh, na zing a hy,” tatah a tah.

³⁷ Piter le Jeims le Jeims a unypaw Johan tah cy ly co ahohmai a zuisah bei he. ³⁸ Synagog a uhtu Jaira ing cawh aa va phah tihtah hnahnawh luri tah le caw le ysang tah a ungpaw sahlo khah a hmuh he. ³⁹ Ing chunglang a nae ka, aa hai letah, “Zecawtamaw hnahnawh luri tah le cawtah naa ung? Ma nyno heh a thih tlung be, a ihning hi,” a tah he. ⁴⁰ Canghrasala Ama cawh aa hnuiso.

Aaning vytei cawh a papia khy tai he tah nyno a no le a paw le a hningzuitu pathung khakhei nyno a ungnah lang khah a nae he. ⁴¹ Nyno cawh a bang tah law ka, “Talitha Kumi,” tatah a tah. A silang cawh, “Nyheh no, tho ka ca tah,” tahnah a cang. ⁴² Ma cangkawleh cawh nyno cawh tho ka, a khiathi. (Ama cawh kung hrawhluihning a cang). Ma cawh aa hmuh tihtah aa ning a ang ngetei. ⁴³ Ma kong cawh ahohmai thuisah ly pawtah a sah pui tah bia a patai he. Taico, “E ruapaw sangkheh kkeh pei my lo,” a tah he.

6

Pasungpanaw lypaw Khazing khuavang (Mt 13:53-58; Luk 4:16-30)

¹ Zisu cawh piathlah ka, a cinglainah khua lang sei ka, a hningzuitu sahlo taco aa zuilai. ² Sabat ning cawh va chuh ka, synagog leco cawngpah he ka, a bia aa thui paw vytei cawh aa ning a ang ngetei.

Aaning taco, “Ma cawngsawpaw heh zehapaw singnah maw aa peh? Zekhatamaw ningang chui paw hming sahlo heh a tua khy? ³ Ama heh kih zungthaipaw khah cang bei maw? Mari sawcapaw Jeims, Josef, Judas le Simon sahlo aa unypaw khah cang bei maw? A satei sahlo zong kaaning khatah ma lehei ung thlang hrah bei he maw?” tah he ka, a cung letah aa lung tling be.

⁴ Zisu tah aa hai letah, “Khazing khuavang cawh a pinah khua letah le a ruachai sahlo le a ingchungkho hrong letah tah cy ly co kawkih letah pasungpanaw a cang,” a tah he. ⁵ A dang lypaw

meh cawngtei cung letah a kih pahnia ka, a dang sahpaw he tah ly co, ma leco ningang chuipaw hming zehmai tua khy be. ⁶ Zingnah aa hnui lynah kong leco a khuarawh a haa. Mataico, ma kaekang hrawng letei a ungpaw khua sahlo cawh tlawng lai ka, a cawngpah lai he.

*Zisu tah a hningzuitu pahrawhluihning a taw he
(Mt 10:5-15; Luk 9:1-6)*

⁷ Zisu tah a hningzuitu pahrawhluihning khah y he ka, thlawpaw pialuipaw cung letah nawhn-uinah pei he ka, pahning longmang tah a taw he.

⁸ Bia a pataipaw he cawh, “Naa khuatlongnah cawtah cungcahrei cy ly co zehmai a pho khe la, zairia cang seh, sahare cang seh a pho khe lo. Naa angki bawng letah tangka zong a sang khe lo. ⁹ Phepakong a pakong la, canghrasala angki zing hning tah a pathai khe lo. ¹⁰ Ing naa tlung tih he tah ma khua naa seisai kaw hlai vytei cawh ahringpaw lang a palong khe lo. ¹¹ Taico zeletahmai tah aa ca cyhlang ly caco he le a cang ly leh naa bia aa nge du ly caco, naa piathlah tihtah aaning khah raering pehnah cawtah naa phe letei luipadih khah cathing thlah si my lo,” a tah he.

¹² Macawtaco aaning sahlo cawh piathlah he ka, cawngsaw vytei cawh aa suanah a ngepachih rua pawtah aa cawngpah he. ¹³ Khachia a hlupui papia he ka, mehdang ly a hlupui zong sathy thu he ka, aa dangsah he.

*Baptisma peitu Johan lu aa tai
(Mt 14:1-12; Luk 9:7-9)*

¹⁴ Zisu ming cawh kawkih letah a thang cawtah Herod siangpahrang tah ma vytei cawh a thui.

Thaikhehpaw tah, “Baptisma peitu Johan khah thihnah taitah thosah kaw cang ka, macawtaco ningang chuipaw hmingtuakhynah a hnuipaw a cang hi,” tatah aa tah.

¹⁵ Thaikhehpaw sahlo taco, “Khazing khuavang Elija a cang,” aa tah.

Taico thaikhehpaw tah, “Khuahlai tei Khazing khuavang pakheh kheh hapaw, Khazing khuavang a cang,” aa tah.

¹⁶ Canghrasala Herod tah ma bia cawh a thui tihtah, “Kama tei a lu ka taipaw Johan khah thihnah taitah thosah kaw a cang!” tatah a tah.

¹⁷ Abui Herod ama ceingei tah baptisma peitu Johan khah tlesah he ka, tongchaisah he ka, thong letah a thlah. Zecawtamaw tatah a nyteipaw Filip a nupuino Herodi khah nupui tah chui ka, a lung a lawngsah du cawtah a cang. ¹⁸ Johan tah Herod khah, “Na nytei nupui na chupaw heh a phung cang be,” tatah a mochia cawtah a cang. ¹⁹ Ma rawng taco Herodi tah Johan khah a lungchung tah a carae ka, thaw a du. ²⁰ Canghrasala, theh khy be zecawtamaw tatah Herod taco Johan cawh mehding le mehpathai a cang tahpaw khah hnih ka, cizaw ngetei ka, a vai lai. Johan bia a reipaw cawh a thui tihtah a chungsi a vang thlang naná teitah a reipaw bia nge cawh a du thlang thly thly.

²¹ A changnah letaco Herodi cawtah a raicangpaw cai cawh a va chuh. Herod tah a pinah ningcai lekhei, uhtu bui a cangpaw sahlo le raekeh bui sahlo le Galili raang chung letei hruitu macang vytei khah kongchuanah a tuapah he. ²² Herodi a sawcanu cawh a za nae ka, a lang tihtah Herod le a khuachai sahlo cawh a lawng ngetei he.

Herod taco nyno hai letah, “Zemaw na du? Na dupaw maikaw pa hae la, ka ca pae a,” tatah a tah.

²³ Taico, chia a sah hmo tei a reipaw cawh, “Na pa haepaw maikaw cawh ka painah raang a chy hmai ka ca peh a tatah bia ka kaang,” a tah vy.

²⁴ Nyno cawh piathlah ka a no cawh, “Zemaw ka hae a?” tatah a hae. A no taco, “Baptisma peitu Johan a lu,” tatah a tah.

²⁵ Ma cangkawleh cawh nyno cawh rairang tah siangpahrang Herod khaco a za nae kaw ka, a haepaw cawh, “Baptisma peitu Johan a lu khah ato hrahing heh daabakho tah pa pei la, ka du,” tatah a tah.

²⁶ Siangpahrang Herod cawh a lung reithui ngetei ka, canghrasala a khuachai sahlo hme letah bia a kaang thah cawtah kheh nyno bia cawh ei du be. ²⁷ Ma cangkawleh cawh raevaitu raekeh pakheh khah rairang tah taw ka, Johan a lu cawh na va tle a tatah a tah. Cawngsawpaw cawh va sei ka, thong-ing leco Johan a lu cawh va tai ka, ²⁸ dabakho tah a lu cawh a va tle. Nyno cawh hlai ka, nyno taco a no cawh a peh pachaw. ²⁹ Ma kong cawh Johan hningzuitu sahlo tah thui he ka, a vong he ka, a rawh cawh law he ka, thlai letah aa phung.

*Zisu tah cawngsaw 5000 lawh a dang he
(Mt 14:13-21; Luk 9:10-17; Jh 6:1-14)*

³⁰ Apostol sahlo cawh aa va kaw kaw tihtah Zisu kae leco a pahmo he ka, aa cawngpah pawhe le aa hming tuapaw vytei khah aa ching. ³¹ Mataico cawngsaw a sei chuhchypaw aa hlutunah cawtah Zisu le a hningzuitu sahlo cawh batui e nápaw cai

hmai hnui be ca he ka, a hningzuitu sahlo khah, “Kama khatah a vong la, a denah lang sei he peh, a hia cawng ná he ceh seh,” a tah he.

³² Macawtaco aaning longtei tah tuilawng tah a kingdangnah lang cawh aa sei. ³³ Canghrasala, aa seipaw a hmuhpaw mehlupui takhei, aaning aa cangpaw khah aa hninah cawtah khua ting taitah va sai he ka, aaning hlai tahmai aa sei ná paw hminghmaw cawh aa phah taw. ³⁴ Zisu cawh tuilawng taitah ka piathlah ka, cawngsaw zawpui khah a hmuh tih he tah kingtu a hnui lypaw tuu sahlo hratah aa cangnah cawtah kheining a do ngetei he. Macawtaco hming hlupui kong cawngpah khah a hrang a patho.

³⁵ Ning cawh tlah daimang ca ka, a hningzuitu sahlo cawh Zisu khatah a vong he ka, “Ma heh raang kingdang tah cang ka, ningkhua zong a tle ngetei myca. ³⁶ Kaa kaekang khua sahlo lang sei sá la, ding e ruapaw a va cawh he seh,” tatah aa tah.

³⁷ Canghrasala Zisu taco, “Naaning tah e ruapaw cawh pei o,” a tah he.

Aaning taco, “Cawngsaw pakheh thlah reh chung nihlo pui a hia caw! Ma vytei co very cawh co he peh ka maw aa e ruapaw cawh kaa pae he a?” tatah aa tah.

³⁸ Zisu taco, “Very tlang khazeh maw naa hnui, va seí la, va ming tua o,” a tah he.

Aa va ming tihtah, “Very tlangpangaw le ngaw sanghning a ung,” aa tah.

³⁹ Taico Zisu tah a hningzuitu sahlo cawh cawngsaw vytei khah a phuphu tah araang cung lekhei a ty sá pawtah bia a peh he. ⁴⁰ Ma hraco

cawngsaw vytei khah zakheh phu, songngaw phu tah a tysah he. ⁴¹ Zisu tah very tlangpangaw le ngaw sanghning cawh law ka, avai lang a y ka, Khazing khatah lawngbia hlai ka, very tlang sahlo cawh a kychy. Mataico, a hningzuitu sahlo khah zawpui cawh rai pawtah a peh he. Mataico ngaw sanghning zong cawh ming vytei hrong leco a rai he. ⁴² Aa zongmingtei co e he ka, aa ri a vaw thlu. ⁴³ A hningzuitu sahlo taco very le ngaw a tangpaw cawh pakhong he ka, baihrav hluihning chih ky tah aa dui. ⁴⁴ Very a epaw sahlo cawh capaw puitling 5000 a cang he.

Zisu tui cung letah a sei
(Mt 14:22-33; Jh 6:15-21)

⁴⁵ Zawpui khah a disah chung he takhei Zisu tah a hningzuitu sahlo cawh rairang tah tuilawng chunglang a naesah he ka, Galili rili raechai Bethsaida khua lang khah a seisah hlang he. ⁴⁶ Aa sei-sai khy tai he tah Ama cawh thlawchang pawtah tlaang cung lang a sei.

⁴⁷ Zailangsang leco tuilawng cawh tuili a lecingcing lekhei ung ka, Zisu cawh Ama longtei tah tlaang lekhei a ung thlang. ⁴⁸ Thli tah a rupui tah a nangnah rawng he tah a hningzuitu sahlo cawh aa lawng khah zeh khy khawh bei he tahpaw Zisu tah a hmuh. Monglang suimehlang papali hrong lekhei Zisu cawh tui cung leco aaning lang va sei ka, aaning khah a khungsai daimang he. ⁴⁹ Canghrasala, tui cung letei a va seipaw khah a hningzuitu sahlo tah aa hmuh tihtah athlaw a cang rua tah he ka, a ysang he.

⁵⁰ Aa zongmingtei tah Ama cawh hmuh he ka, aa ci ngetei.

Ma cangkawleh cawh Zisu tah, “Naa thlawza-wng kheh seh, kama ka cang, ci khe o,” a tah he.

⁵¹ Mataico tuilawng lang cawh aaning khatah a nae ka, thli cawh a de. Mataico, a hningzuitu sahlo cawh aa khuarawh a haa ngetei. ⁵² Aa lungku khah pachawsah aa cangnah cawtah very kong khah aa lunghaa be.

⁵³ Raechai lang khah va cakah he ka, Genesaret raang khah va phah he ka, aa lawng cawh ma leco aa hrai. ⁵⁴ Tuilawng taitah aa ka pia cangkawleh cawngsaw tah Zisu a cang tahpaw khah aa hni.

⁵⁵ Ma letei cawngsaw sahlo cawh a kawkih ná tah sai he ka, a ung tatei aa thuinah maikaw leco, a sahpaw sahlo cawh aphia tah aa va song he.

⁵⁶ Taico, khuapui sahlo letah cang seh, khuatei sahlo letah le raang chung letah cang seh a seinah maikaw lekhei, a dang lypaw sahlo khah chodo tlaang lekhei aa chuakhui he. A pai dong tei chang tongsah rua pawtah naw he ka, Ama a tongpaw vytei cawh a dang he.

7

A pathaipaw le a pathai lypaw (Mt 15:1-20)

¹ Farasi sahlo le Jerusalem taitei a vongpaw he phungbia cawngpahtu thaikheh taco Zisu cawh cadung he ka, ² a hningzuitu thaikheh cawh kih si phung a cangpaw khah zui lytah kih si lytah batui aa epaw khah aa hmuh he. ³ Farasi sahlo le

Juda cawngsaw vytei cawh aa pupaw leh cawng-pahnah phungbia hrakhei kih si taw ly co, batui e bei he. ⁴ Chodo tlaang letah hming aa cawh tih zong tah kih si ly co batui e bei he. Taico ahringpaw pupaw phung sahlo aa zuipaw ung vy ka, ma sahlo cawh ny sahlo, daabei sahlo, ketli sahlo sipathai tah hapaw sahlo khah a cang.

⁵ Macawtaco, Farasi sahlo le phungbia cawng-pahtu sahlo tah, “Zecawtamaw, na hningzuitu sahlo heh pupaw phungbia zui lytah a pathai lypaw kih tah batui aa e zia?” tatah Zisu cawh aa tah.

⁶ Zisu tah aaning cawh, “Khazing khuavang Isaiah tei naaning cungmai raipha sahlo naa kong a reihlangpaw heh a hmang caimang. Isaiah tah, ‘Ma cawngsaw sahlo tahei aa hmokaw co aa pa cizaw, canghrasala aa lungthing cawh kama taitah a hlah ngetei he.

⁷ Aa pa behpaw zong heh aa cawtah zehmai chahnai be.

Aa cawngpahnah zong heh mehnung tuachawngpaw phungphe sahlo suipaw a cang he,’[☆]

tatah a cia. ⁸ Khazing biapah sahlo laky khah sei-sai he ceh ka, mehnung tuachawngpaw phungbia cawh na tle hri he ceh,” tatah a chai he.

⁹ Taico aa hai letah, “Naaning naa phungbia sahlo zui nápaw cawtah Khazing biapah sahlo hneihly cawh naa thai ngetei. ¹⁰ Moses tah, ‘Na no na paw cizaw my lo,’[☆] taico, ‘A no cang seh, a paw cang seh chia a sahpaw cawh thaw a cang

a, ☆ a tah. ¹¹ Canghrasala naaning tah naa tahpaw cawh cawngsaw pakheh tah a paw a cang ly leh a no khatah, ‘Kama taitah na hmuh khy a paw bawnah cawh Korban, (A silang cawh Khazing khatah pehlai a cang thah) a cang a,’ a tah caco, ¹² ma cawngsawpaw cawh a no a cang ly leh a paw cung letah zehmai tuasah sai khawh bei he ceh. ¹³ Naa hlai pachaw laipaw he ceh phungbia khei Khazing bia khah zelypaw tah naa cangsah. Taico, hming hringpaw sahlo zong ma hraco naa tua,” a tah he.

¹⁴ Zisu tah ming zawpui khah Ama khatah y kaw he ka, “Ming vytei, ka bia heh nawthlia la, hnih thai my lo. ¹⁵ Kaw taitah chunglang a naepaw taco cawngsaw khah papia palui be. Kaw taitah a ka piapaw dutei taco cawngsaw khah a papia palui. ¹⁶ Thuinah nawkho a hnuipaw maikaw taco thui he seh,” a tah.*

¹⁷ Zawpui cawh seisai he ka, ing chunglang a nae khy taitah a hningzuitu sahlo taco tawch-ingnah bia a silang khah aa hae. ¹⁸ Zisu taco, “Naaning zong ma tlua co maw naa lung a co? Kaw taitei chunglang a naepaw taco cawngsaw cawh papia palui khy be tahpaw cawh hnih bei he ceh maw? ¹⁹ Zecawtamaw tatah a lungthing chunglang a nae lytah a ri lang a nae ka, alailang a pia kaw thlang,” a tah he. Zisu tah ma hrarei a reipaw heh zehapaw epaw hmai a pathai a tah dunah a cang.

²⁰ Ma hrahei rei vy ka, “Thinglung chung taitah a kapiapaw tahei cawngsaw cawh a papia a palui

☆ **7:10** Piachua 21:17 * **7:16** Kih cia thaikheh leco cai 16 heh ung be.

tei. ²¹ Zecawtamaw tatah cawngsaw lungthing chung taihei a chaw lypaw khuarawnah sahlo, canu capaw suanah, ruhnah, lenongnah, a pheinah, ²² duhlui hnuinah, zia hnuinah, hinghenah, hohenah, hnachuanah, male thai pachianah, a palai a patuinah le a ningcang lytah khuasahnah tahpaw sahlo a chuh he. ²³ Ma hmingchaw ly vytei heh chunglang taitei a ka piapaw cang he ka, cawngsaw a papia a palui sahpaw a cang he,” a tah he.

Siria Fonisia canuno a zingnah
(Mt 15:21-28)

²⁴ Zisu cawh ma hminghmaw cawh seisai ka, Tair khua kaekang lang a sei. Ingkheh chung letah a nae ka, ahohmai khah hnisah du bei he, canghrasala a nawh khy hlui be. ²⁵ A sawcanu thlawpaw pialuipaw tei a tlepaw canu pakheh cawh Zisu kong a thui cangkawleh rairang tah a vong ka, a phehrang lekhei a bawh. ²⁶ Ma canuno cawh Siria pai Fonisia raang letei a pipaw, Grik cawngsaw a cang. A sawcanu chung letei khachia papia pah pawtah Zisu cawh a naw.

²⁷ Zisu taco, “Sawtei leh taco aa dupaw vytei e taw he seh. Sawtei leh aa very cawh lá tah ui sahlo peh cawh a phung cang be,” tatah a tah.

²⁸ Canuno taco, “A cang, Abuipaw, canghrasala cabuai rai letei a ungpaw ui sahlo taco sawtei leh didang cawh aa khi thlang hrah,” tatah a palei.

²⁹ Mataico Zisu tah, “Ma hrarei na pachainah cawtah hei, ing lang na dih khy. Khachia tah na sawcanu cawh a piasai thah,” tatah a tah.

³⁰ Cawngsawno cawh ing lang cawh a dih ka, khachia tei a piasai thahpaw a sawcanu cawh lakhing letah a lia thlangpaw khah a hmuh.

A naw pang katei a rei a thlaw thai lypaw dangsahnah

³¹ Ma khy taico Zisu cawh Tair khua taikhei piathlah ka, Sidon khua cahrong ka, Galili rili lang cungthlah ka, Dekapoli raang lang a sei. ³² Ma leco cawngsaw pakheh a nawpang katei, a rei a thlaw thai lypaw cawh Ama khatah va chua khui he ka, a cung letah a kih pahnia pawtah Zisu cawh aa naw.

³³ Zisu tah ama cawh zawpui hrong taico piathlah khui ka, a nawkho chunglang cawh a kihdong a cahro. Mataico a ci tah chawh ka, a lui cawh a tong. ³⁴ Avai lang a y ka, a sah pui tah a husua ka, cawngsawpaw khaco, “Effatha,” (A silang cawh a hong tua tahnah a cang) tatah a tah. ³⁵ Ma cangkawleh cawh a naw cawh a awng ka, a lui cawh a ka catlai ka, achaw teitah bia a rei.

³⁶ Zisu tah ahohmai thuisah khe lo tatah bia a patai he. Canghrasala, a hlu vy bia a patai he leh, a hlu vy tah aa reilai tima. ³⁷ Cawngsaw sahlo cawh aa khuarawh a haa ngetei. Aaning taco, “A tuapaw hming vytei heh a chah caimang. A nawpangpaw hmai khua thuisah ka, a rei a thlaw thai lypaw zong a rei a thlawsah,” tatah aa tah.

8

*Zisu tah mehnung 4000 batui a dang he
(Mt 15:32-39)*

¹ Ma ningcai leco, cawngsaw hringpaw a hlupui a pahmo hui he. Epaw zehmai aa hnuilynah cawtah Zisu tah a hningzuitu sahlo cawh y he ka, ² “Ma cawngsaw sahlo heh kama khatah ningthung tai ung myca he ka, e ruapaw zehmai aa hnui khawh ly cawtah ka ning aa pa do ngetei. ³ Aa ngaidi hmotah tlungsah my he neh seh la, lang letah a baw he a. Zecawtamaw tatah mehthaikheh cawh langhlaw pui taitah a va chuhpaw aa cang cawtah,” a tah he.

⁴ A hningzuitu sahlo taco, “Ma raang kingdang lehei ma vytei mehnung dang ruapaw lawh heh ahomaw a hmuh khy a?” tatah aa chai.

⁵ Zisu tah, “Very tlang khazeh maw naa hnui?” tatah a hae he.

“Tlangsarih,” tatah aa chai.

⁶ Ming zawpui cawh alui letah a tysah he. Ma khy taico very tlangsarih cawh law ka, Khazing khatah lawngbia a hlai khy taitah ky chy ka, a hningzuitu sahlo cawh zawpui khah rai rua pawtah a peh he. A hningzuitu sahlo tah zawpui cawh aa rai he. ⁷ Ngadih a cawngpe hnui pai he ka, ma caw zong taco alawngnah bia hlai ka, a hningzuitu sahlo khah raipai law a tah he. ⁸ Aa dawngkasawny co e he ka, aa ri a vaw ngetei. Taico, a hningzuitu sahlo tah ebangpaw cawh pakhong he ka, baisarih chih ky tah aa dui. ⁹ Ma letei very a epaw he cawh patling 4000 hrawng a tah he. Mataico Zisu tah zawpui cawh ing lang a disah he. ¹⁰ Ma khy taico a hningzuitu sahlo khatah tuilawng chunglang a nae he ka, Dalmanutha pai lang aa sei.

¹¹ Farasi sahlo cawh Zisu khatah a vong he ka, bia aa hae. Ama khah pase du tah vaicung langtei ningang chuipaw paching pakhanah tua khah aa sia. ¹² A hu a sah pui tah sua ka, “Atochai cawngsaw tahei zecawtamaw ningang chuipaw paching pakhanah heh aa du tlong? Biahmuisui ka ca ching he, ma hapaw hming cawh peh cang a bei he,” tatah a tah. ¹³ Taico, aaning cawh seisai he ka, tuilawng chunglang cawh a nae ka, Galili tuiping raechai lang a sei.

*Farasi sahlo le Herod raangri
(Mt 16:5-12)*

¹⁴ A hningzuitu sahlo tah very a pho monghly he ka, tuilawng chung leco aaning khatah tlangkheh tei suipaw a ung. ¹⁵ Taico Zisu tah aaning sahlo cawh, “Farasi sahlo le Herod raangri taikhei a vai la, a raering my lo,” tatah a tah he.

¹⁶ A hningzuitu sahlo tah, “Very kaa hnui ly cawtah a reipaw a cang,” tatah pakheh le pakheh a tah tlungmang he.

¹⁷ Zisu tah aa reipaw bia khah hnih ka, aaning khah, “Zecawtamaw very naa hnui lypaw kong naa rei leimei? Ato tingtai hnih thai ting bei he ceh maw? Naa lung a ku achaw caw tamaw? ¹⁸ Meh hnui thlang tlung pawtah hmuh bei he ceh maw? Naw hnui thlang tlung pawtah thui bei he ceh maw? Taico a thui thlang bei he ceh maw? ¹⁹ Mehnung 5000 caw tei very tlang pangaw ka chy ning takhei a hluipaw khah bai khazeh maw naa dui kha?” tatah hae he ka, “Baihraw hluihning,” tatah aa chai.

²⁰ Taico Zisu tah, “Taico mehnung 4000 caw tei very tlang sarikh ka chy ning takhei a hluipaw bai khazeh maw naa dui vy kha?” tatah hae he ka, “Bai sarikh,” tatah aa chai.

²¹ Zisu taco, “Ma naná co hmai hnih thai ting bei he ceh maw?” tatah a tah he.

Bethsaida letah mehcopaw a dangsah

²² Bethsaida khua cawh va phah he ka, mehcopaw pakheh khah cawngsaw thaikheh tah va chua khui he ka, tongpá pawtah Zisu cawh aa naw. ²³ Taico mehcopaw cawh a kih tah tle ka, khua lailang a piakhui. A mehkho leco a ci tah chawh ka, a cung letah a kih chia ka, “Zehming sangkheh chang na hmuh maw?” tatah a hae.

²⁴ Mehcopaw cawh a ka hui ka, “Cawngsaw hmuh he neh ka, thingkungpaw sahlo aa seilaipaw ky aa lo,” tatah a tah.

²⁵ Zisu tah a meh cung leco a kih cawh a chia kaw. Taico a meh cawh ka dui ka, khuahmuh kaw ka, zezongpui khah a sepaw teitah a hmuh khy he. ²⁶ Taico Zisu tah a ing lang a disah ka, “Khua chunglang a nae kaw kheh lo,” tatah a tah.

Piter tah Zisu kong a rei

(Mt 16:13-20; Luk 9:18-21)

²⁷ Zisu le a hningzuitu sahlo cawh Sisaria Filipi a kaekang letei khuatei sahlo lang cawh a sei he. Aa seilaining taco, a hningzuitu sahlo khah, “Cawngsaw tah aho aa pa tah maw?” tatah a hae he.

²⁸ A hningzuitu sahlo tah, “Thaikhehpaw tah baptisma peitu Johan a cang aa ca tah, thaikhehpaw tah Elija a cang ca tah he ka, ahringpaw taco

Khazing khuavang pakheh kheh cawh a cang aa ca tah,” tatah aa tah.

²⁹ Zisu tah, “Naaning tah saw aho a cang naa pa tah maw?” tatah a hae he.

Piter tah, “Nama cawh Khri* cawh na cang,” tatah a chai.

³⁰ Zisu tah Ama a kong khah ahohmai ching khe lo tatah raeringnah a peh he.

*Zisu tah a thih ná^{paw} kong a reihlang
(Mt 16:21-28; Luk 9:22-27)*

³¹ Taico, Cawngsaw Sawcapaw tah taithuinah a hlupui ing ka, macang sahlo le tlangbui macang sahlo le phungbia cawngpahtu sahlo tah hlawh a he ka, aa thaw a. Canghrasala ningthung khy tah a tho kaw a, tatah cawngpah hrang a patho he. ³² Ma bia cawh a sepaw teitah Zisu tah a ching he. Taico, Piter taco a caki lang seikhui ka, a mochia.

³³ Canghrasala Zisu cawh a paleh ka, a hn-ingzuitu sahlo khah ming he ka, Piter cawh a raw. “Setan, kama tai hei seihly! Khazing lang hming pacang ly ceh tah cawngsaw lang hming na pacang vy hri hi,” tatah a tah.

³⁴ Taico Zisu tah a hningzuitu le zawpui cawh Ama khatah y he ka, “Ahohmai zui a pa dupaw cawh ama a dunah khah seisai seh la, a khraws cawh a puh seh la, pazui seh. ³⁵ Zecawtamaw tatah a hringnah pachah a dupaw taco hly a ka, canghrasala, Kama le thawngchawbia rawng tah a hringnah a hlypaw taco a pachah a. ³⁶ Cawngsaw pakheh tah khazaw heh a pungpaluh tah hnui seh la, a thlawpaw a sung

* **8:29** Khri (Grik rei), Mesiah (Hebru rei) aa silang cawh, Sathy thupaw,tahnah a cang.

caco zemaw a cawtah a chahnai a? ³⁷ Cawngsaw tah a thlawpaw khah hmuh kaw pawtah zemaw a peh khypaw a ung? ³⁸ Atochai a pheinah chai le, suanah chai lehei Kama le ka bia a zawkhuipaw maikaw cawh Cawngsaw Sawcapaw tah a Paw rungnawnah le a vaiming pathai sahlo khatah a za cung tihtah a zawkhui hra he a,” tatah a tah he.

9

¹ Mataico, aaning cawh, “Biahmuisui ka ca ching he, ma lehei a daw thlangpaw sahlo hrong lehei Khazing painah raang cawh hmingtuakhy-nah khatah a va tlungpaw aa hmuh hlai taco mehthaikheh cawh thi balang bei he,” tatah a tah.

Zisu mehme a thlai
(Mt 17:1-13; Luk 9:28-36)

² Taico, ningruh khy tah Piter le Jeims le Johan cawh Zisu tah tlaang sangpaw lang a kekhuui he. Ma leco aaning teitah aa ungning tah Zisu cawh aa hmekaw leco a hmuisang cawh a thlai. ³ A chaichi cawh raang ngetei ka, a khaipaleh he. Cawngsaw tei aa rangsah khypaw navy tah a rang vy syly he. ⁴ Aa hmekaw leco Elija le Moses cawh a va lang he ka, Zisu khatah bia aa rei hrui leime.

⁵ Piter taco Zisu cawh, “Cawngpahtu, ma lehei ung heh kaa cawtah a chah ngetei. Thlangda nama na cawtah sangkheh, Moses cawtah sangkheh, Elija cawtah sangkheh tatah sangthung sah a he peh,” tatah a tah. ⁶ Aa ci tu cawtah zemaw ka rei a tahpaw hmai hnih be.

⁷ Taico aa cung letah meding cawh va thang ka, aaning cawh pahlong he ka, meding chung taico,

“Ma heh ka dopaw ka Sawcapaw a cang, a bia nge my lo!” tatah o a za ring.

⁸ Aa kaekang cawh a hui tlamang he ka, Zisu tah cy ly co ahohmai hmuh bei he.

⁹ Tlaang cung taitah aa za cungthlah ning takhei Zisu tah, “Cawngsaw Sawcapaw heh thihnah taitah a tho kaw hlai vytei cawh naa hmuhpaw khah ahohmai ching khe lo,” tatah a tah he. ¹⁰ Ma kong khah aa lung chung letah a cingkai thlang he ka, canghrasala aaning le aaning cawh, “Thihnah taitah tho kaw, a tahpaw heh ze silang maw a cang?” takhah aa reisia.

¹¹ Taico Zisu cawh, “Zecawtamaw phungbia cawngpahtu sahlo tah Mesiah hlai tah Elija a vong taw hrahing a, aa tah?” tatah aa hae.

¹² Zisu tah, “Elija cawh a vong taw hmuissui ka, zezongpui khah a parai pacia thlu. A cang caco, zecawtamaw Cawngsaw Sawcapaw cawh a sah pui tah tai-ing a ka, hlawh a cang a tatah Capathai letah cia a cang? ¹³ Canghrasala, ka ca ching he, Elija cawh a vong thah ka, Capathai letah ciapaw tei hrakhei aa dudú khei ama cawh aa tua thah,” tatah a palei he.

Zisu tah nyhehpaw a dangsah

(Mt 17:14-20; Luk 9:37-43)

¹⁴ A hningzuitu ahringpaw sahlo aa kung aa va phah tihtah cawngsaw hlupui tah za pahlong thlang he katei, phungbia cawngpahtu thaikhehpaw sahlo khatah bia a za ei leimeipaw he khah aa hmuh. ¹⁵ Zawpui takhei Zisu aa hmuh cangkawleh aa khuarawha ka, va saihno he ka, aa va dai.

¹⁶ Zisu tah, “Aaning sahlo khatah ze kong maw na ei leimei he ceh?” tatah a hae he.

¹⁷ Zawpui hrong taitah pakhehpaw tah, “Cawngpahtu, ka sawcapaw cawh khachia tah a tle cawtah a rei zong thlaw khy be ca ka, nama khatah ka va seikhui. ¹⁸ Khachia tah a chuahno ning maikaw leh alui letah a va chai. A ci tatabu chuh ka, a haw ria ka, a hruipaking tei. Na hningzuitu sahlo heh khachia papia pá pawtah naw he neh ka, canghrasala papia khy bei he,” tatah a tah.

¹⁹ Taico Zisu tah, “Vy zingnah a hnui lypaw cawngsaw sahlo, ze tih tai maw naaning khatah ka ung a? Ze tih tai maw ka lung ka ca pasua pá he a? Nyhehpaw cawh a vong khui tua o,” a tah he.

²⁰ Taico nyhehpaw cawh a vong khui he. Khachia tah Zisu khah a hmuh cangkawleh nyhehpaw cawh alui letah phongchai ka, ama le ama hmai a hni lytah a paleh a pathae ka, a ci tatabu zong a chuh thlu.

²¹ Zisu tah, “Ma hratei a ungpaw heh zekhah cai maw a tah?” tatah nyhehpaw a paw khah hae ka, “A nyheh teitah,” tatah a paw taco a tah. ²² Taico a paw taco, “Me chunglang bo ka, tui chunglang zong thlah ka, uihlupui a thaw daimang tei. Na tua khy caco, ning ma do la, ma baw ky law,” tatah a tah.

²³ Zisu taco, “Na tua khy caco na tah maw? Zingnah a hnuipaw caw taco zezong tua khy a cang,” tatah a tah.

²⁴ Ma cangkaw leco, a paw cawh, “Ka zing hmuisui, ka zing vy nápw cawtah pa baw ky law,” tatah a tah.

²⁵ Zawpui tah aaning lang a va ne vy leimeipaw he khah a hmuh tihtah Zisu tah thlawpaw pi-aluipaw cawh a hrangso ka, “Nama, a naw a pangpaw le a rei a thlaw thai lypaw thlawpaw, ny-hehpaw chung taikhei piathlah la, zening tahmai a nae kaw khawh kheh tatah bia ka ca peh,” tatah a tah.

²⁶ Khachia cawh ka sang ka, nyhehpaw khah a sah pui tah cathing si ka, a chung taico a piathlah. Nyhehpaw cawh mehthi rawh lo ka, macawtaco cawngsaw vytei tah, “A thi thah,” tatah aa tah.

²⁷ Canghrasala, Zisu tah a bang tah tle ka, patho ka, a ka daw.

²⁸ Taico Zisu cawh ing chunglang a nae khy taitah a hningzuitu sahlo tah, “Zecawtamaw kaaning tah kaa papia khy be?” tatah aparuh teitah aa hae.

²⁹ Zisu taco, “Ma hapaw hming heh cawh thlawchangnah tah cy ly co zetahmai papia khy cang be,” tatah a palei he.

³⁰ Ma hminghmaw taico Zisu le a hningzuitu sahlo cawh piathlah he ka, Galili raang cahrong pai tah aa sei. Zisu tah zeletamaw aa ung tahpaw khah ahohmai hnisah du bei he. ³¹ Zecawtamaw tatah a hningzuitu sahlo khah a cawngpah leimei ning he cawtah a cang. Aaning cawh, “Cawngsaw Sawcapaw heh cawngsaw sahlo kih letah luitae a cang myca a. Aaning sahlo taco aa thaw a, taico ning thung khy letah a tho kaw a,” a tah he.

³² Canghrasala a rei dupaw khah aa hni ly naná teitah Ama khah hae hri ngang bei he.

Ahomaw alaikai
(Mt 18:1-5; Luk 9:46-48)

³³ Kapernaum khua khah va phah he ka, ing chunglang a nae ka, a hningzuitu sahlo cawh, “Langpui lekhei zemaw na ei lai leimei he ceh?” tatah a hae he. ³⁴ Canghrasala palei bei he. Ze-cawtamaw tatah langpui letei a ei laipaw he cawh kaaning hrong lehei ahomaw alai caipaw a cang a takhah a cangnah cawtah.

³⁵ Zisu cawh a ty ka, a hningzuitu hluihning khah y he ka, “Ahohmai alaicaipaw cang a du-paw cawh a nytaw caipaw tah a tua seh la, ming maikaw raihretu tah a tua seh,” a tah he.

³⁶ Nyhehpaw cawh law ka, aa hrong letah a dawsah. Pawng ka, aa hai letah, ³⁷ “Ahohmai kama ka ming tah ma hapaw nyhehte heh a cyhlangpaw cawh kama a pa cyhlangpaw a cang. Ahotahmai kama a pa cyhlangpaw cawh a pa tawtupaw a cyhlangpaw a cang,” a tah he.

A ma carae lypaw cawh kaa cawngsaw a cang he

(Luk 9:49-50; 18:6-9; Luk 17:1-2)

³⁸ Johan taco, “Cawngpahtu, cawngsaw pakheh tah na ming tah khachia a papia leimeipaw hmuh he peh ka, kaa bu cawngsaw a cang lynah cawtah tua kheh law tatah kaa thly,” tatah a tah.

³⁹ Zisu taco, “Thly khe o, ka ming tah ningang chuipaw hming a tuapaw taco, a tua khy taikhei co a ry hlai leco pa reipachia a beh. ⁴⁰ Ahohmai a ma cakhae lypaw maikaw cawh kaa cawngsaw a cang he. ⁴¹ Biahmuisui ka ca ching he, ahohmai, Khri tei naa cangnah cawtah ka ming tah tui cakaw ny kheh tei hmai a ca peipaw he cawh aa longmai cawh hmuh lytah ung hrahiring a bei he.

⁴² Taico pakheh kheh tah Kama a pa zingpaw ny-heh tei pakheh khah a suasah caco a hirong letah sangrianah lung pathle tah rili chunglang thlah he seh la, a cawtah a chah vy a. ⁴³ Na kih tah a ca suasah caco, taichung la, vathlang. Kih rahning tah a de thai lypaw hrai hming me lang tlah navy co, kih hnui ly tei chaizaw hringnah chunglang a nae cawh na cawtah a chah vy.* ⁴⁵ Na phe tah a ca suasah caco, taichung la, vathlang. Phe rahning chi tei hrai hming chunglang tlah navy co, phe lytah chaizaw hringnah chunglang a nae cawh na cawtah a chah vy. ⁴⁷ Mataico na meh tah a ca suasah caco, khy hly thlang. Meh rahning chitah hrai hming lang tlah navy co Khazing painah raang chunglang meh rakheh khatah a nae khah na cawtah a chah vy. ⁴⁸ Hrai hming chung leco, ‘Salung zong thi be ca he ka, me zong de beh.’☆ ⁴⁹ Cawngsaw maikaw cawh me kheh paci hratah aesah a cang he a.

⁵⁰ Paci cawh a chah, canghrasala a aenah a ly caco, zekhatamaw na aesah khy khaw a? Paci hratah ae la, pakheh le pakheh a dorai teitah ung my lo,” a tah he.

10

Nuvaw a chainah kong
(Mt 19:1-12; Luk 16:18)

¹ Ma khy taico Zisu cawh ma hminghmaw taico piathlah ka, Judia raang le Jordan tuivaw rae lang khah a sei. Ma leco cawngsaw hlupui cawh Ama

* **9:43** Kih cia thaikheh taco cai 48 khatah a lopaw cai 44 le, cai 46 heh aa baichi he. ☆ **9:48** Isai 66:24

khatah a vong hui he ka, a tua teipaw hratah aaning cawh a cawngpah he.

² Ama khah pase du tah Farasi thaikheh sahlo cawh Ama khatah a vong he. A hai letah, “Capaw tah nupui mah heh a phung a cang maw?” tatah aa hae.

³ Ama taco, “Moses tah zekhatamaw phungbia a ca peh he?” tatah a palei he.

⁴ Aaning taco, “Moses tei bia a mah pehpaw cawh capaw tah a nupui cawh mahnah ca a cia-pah caco, a mah khy thlang,” tatah aa tah.

⁵ Taico Zisu tah, “Moses tei ma phungbia a ca cia pahpaw he cawh naa lung a khong tunah caw-tah a cang. ⁶ Canghrasala, a hrangthoning taco, ‘Khazing tah canu le capaw tatah a tua he.’[☆] ⁷ ‘Ma rawng taco capaw tah a no le a paw khah seisai a he ka, a nupui khatah a pahlawng a ka, ⁸ ma tlaw pahning cawh ngaisaw pungkheh tah aa cang a.’[☆] Macawtaco aaning cawh pahning cang khawh bei he, pakheh a cang myca he. ⁹ Macawtaco, Khazing tei a patongpaw he cawh cawngsaw tah pachai kheh he seh,” tatah a palei he.

¹⁰ Ing chunglang a nae kaw khy tai he tah a hningzuitu sahlo tah ma kong khah Zisu aa hae.

¹¹ Zisu tah, “A nupui mah katei, ahringpaw canu a chuipaw cawh a nupui khah a pheisaipaw a cang. ¹² Ma hraco canu tah a pasae khah kawsai tah capaw ahringpaw khatah a pahlawng caco, a pasae a pheisaipaw a cang hrah,” tatah a tah he.

*Zisu le nyhehteih sahlo
(Mt 19:13-15; Luk 18:15-17)*

¹³ Taico, Zisu tah tong he seh la, bonghnang song he seh tah du tah nyhehteih sahlo khah va chua khui he ka, canghrasala, a hningzuitu sahlo tah aa raw he. ¹⁴ Zisu tah ma cawh a hmuh tihtah a thingae ka, aa hai letah, “Nyheh sahlo cawh kama khatah a vong he seh, pakhang khe o. Zecawtamaw tatah Khazing painah raang cawh ma hapaw sahlo aa tei khah a cang. ¹⁵ Biahmuisui ka ca ching he, Khazing painah raang cawh nyheh hratei a cyhlang lypaw taco a chung lang a nae by a be,” tatah a tah. ¹⁶ Taico nyhehteih sahlo cawh aa bang tah tle he ka, aa cung letah a kih pahnia ka, bonghnang a song he.

Mehrung satlepaw kong
(Mt 19:16-30; Luk 18:18-30)

¹⁷ Zisu cawh khuatlong pawtah a tho ning takhei cawngsaw pakheh va sai ka, a hmekung letah a khuh a panai. “Cawngpahtu chaw, chaizaw hringnah ka hmuh khy ná pawtah zemaw ka tua a?” tatah a hae.

¹⁸ Zisu taco, “Zecawtamaw a chawpaw na pa tah? Khazing tah cy ly co ahohmai a chawpaw ung bei he. ¹⁹ Biapheh sahlo cawh na hni thlang. ‘Lenong kheh, a phei kheh, ru kheh, ahmang lypaw bia hnikhuitu cang kheh, dungkhei hmang kheh, na no le na paw cizaw my lo,’[☆] tahpaw sahlo a cang he,” tatah a tah.

²⁰ Ma satlepaw taco, “Cawngpahtu, ma hming vytei heh cawh ka nyheh ning taitah ka zui ciapaw longtei a cang,” tatah a chai.

[☆] **10:19** Piachua 20:12-16; Biary 5:16-20

²¹ Zisu tah ama cawh ming ka, a cung letah donah a hnui. “Hming sangkheh na by. Va sei la, na hnuipaw vytei va zua la, mehsisah khah tangka va pei la, vaicung letah chosung na hnui a, taico a vong la, pa zui,” tatah a tah.

²² Ma bia cawh a thui tihtah satlepaw cawh a hme a chia. Ama cawh mehrung a cangnah cawtah a ngechia hmotah a sei hly.

²³ Zisu tah a kaekang leco ming ka, a hningzuitu sahlo hai letah, “Mehrung cai taco Khazing painah raang letah a nae heh a ru caimang!” tatah a tah.

²⁴ A hningzuitu sahlo tah ma bia cawh aa thui tihtah aa khuarawh a haa ngetei. Canghrasala Zisu tah, “Ka sawtei sahlo, Khazing painah raang letei a nae heh a ru caimang! ²⁵ Mehrung tei Khazing painah raang letah a nae navy co ceiphing kho letah sahisy a nae heh a neh vy a,” tatah a tah vy he.

²⁶ A hningzuitu sahlo taco, aa ningang hmotah, “A cang caco, ahomaw pachah a cang khy a?” tatah aaning le aaning a tah he.

²⁷ Zisu tah aaning cawh ming he ka, “Ma hming heh cawngsaw caw taco cang khy be, canghrasala, Khazing caw taco a cang khy lypaw zehmai ung be,” a tah he.

²⁸ Piter tah Zisu cawh, “Kaaning taco zezongpui seisai tah kaa ca zui hi,” tatah a tah.

²⁹ Zisu tah, “Biahmuisui ka ca ching he, kama ka rawng tah le, thawngchawbia rawng tah a ing maw, a uny sahlo maw, a satei sahlo maw, a no maw, a paw maw, a sawtei sahlo maw, a ly sahlo maw, a seisaipaw maikaw cawh, ³⁰ ato hringchung cai lehei a leh zakheh tah aa hmuh a.

Ing sahlo, uny sahlo, satei sahlo, no sahlo, sawtei sahlo le, ly sahlo khahei hrehnah zong khah aa hmuh a. Mataico a va chuh lepaw cai letah chaizaw hringnah zong aa ting a. ³¹ Canghrasala, a hme a sahpaaw mehlupui cawh hningkha he ka, a hningkhapaw cawh hme aa sah tae a,” tatah a tah he.

*Zisu tah a thih nápaaw kong a reihlang vy
(Mt 20:17-19; Luk 18:31-34)*

³² Jerusalem khuapui lang cawh seichy he ka, Zisu tah langhme a chuilai he. A hningzuitu pahrawhluihning sahlo cawh aa khuarawha ka, ahringpaw a zuipaw sahlo zong taco aa ci. A hningzuitu pahrawhluihning cawh aaning teitah Zisu tah seihly khui he ka, a cung letei a va tlung lepaw khah a ching he. ³³ Zisu tah, “Atoheh Jerusalem khuapui lang sei he peh ka, Cawngsaw Sawcapaw heh tlangbui macang sahlo le phung-bia cawngpahtu sahlo khatah luithae a cang a. Aaning sahlo taco thaw pawtah thaily cangsah a he ka, Gental cawngsaw sahlo kih letah peh a cang a. ³⁴ Ma sahlo taco pasipasa he ka, aa ci tah chawh a he ka, basung tah chei a he ka, aa thaw a. Ningthung khy taitah a tho kaw a,” a tah he.

*Jeims le Johan tah hming aa haepaw
(Mt 20:20-28)*

³⁵ Taico, Zebedi sawcapaw leh Jeims le Johan cawh Zisu khatah a vong he. A hai leco, “Cawng-pahtu, kaa ca haepaw maikaw ma tuapah law tah kaa du,” tatah aa tah.

³⁶ Zisu taco, “Naa cawtah ze hming maw ma tuapah seh tah naa du?” tatah a hae he.

³⁷ Aaning taco, “Na painah a rungnawpaw letah na cacang lang pakheh, na cavui lang pakheh a ma tysah la, tah kaa du,” tatah aa palei.

³⁸ Zisu taco, “Naa haepaw heh hnih thai bei he ceh. Ka ding lepaw tai-ingnah ny heh naa ding khy a maw? Thihnah baptisma ka ing ruapaw zong naa ing khy a maw?” tatah a tah he.

³⁹ Aaning taco, “Kaa ding khy a,” tatah aa chai.

Zisu taco, “Ka ding ruapaw tai-ingnah ny zong ding he ceh ka, ka ing ruapaw thihnah baptisma zong naa ing a. ⁴⁰ Canghrasala, ka cacang lang le ka cavui lang tah a tynah naw cawh kama ka rei cang be. Ma hming sahlo cawh Khazing tei a pachia pahpaw sahlo aa cawtah a cang,” tatah a tah he.

⁴¹ Ma bia cawh a hningzuitu ahringpaw pahraw tah aa thui tihtah Jeims le Johan aa cung leco aa thing a ae ngetei. ⁴² Taico, Zisu tah hmingkheh tah y he ka, “Gental cawngsaw sahlo uhtu bui a cangpaw sahlo taco aa rai leteipaw sahlo cung letah abui tah a bui so he ka, builai sahlo cawh aa cung letah naw aa hnui ngetei tahpaw khah naa hni. ⁴³ Naaning sahlo cawh ma hraco naa cang ruapaw cang be. Ma navy co, naaning hrong lehei mehlai cang a dupaw taco, naa raihretu tah a tua seh la, ⁴⁴ a pakhehnah cang a dupaw taco, cawngsaw maikaw sae tah a tuapaw a cang. ⁴⁵ Cawngsaw Sawcapaw heh a rai hrepá pawtah cang lytah male rai hre rua pawtah le mehlupui tlang ruapaw cawtah a hringnah peh rua pawtah a vongpaw hrahei,” a tah he.

*Mehcopaw Bartimai tah khua a hmuh kaw
(Mt 20:29-34; Luk 18:35-43)*

⁴⁶ Mataico Jeriko khua aa va phah. Zisu le a hn-ingzuitu sahlo le ming rungpoi cawh Jeriko khua taitah aa piathlah ning takhei, Timai a sawteipaw Bartimai, mehcopaw cawh kih do pawtah langpoi kae letah a ty thlang. ⁴⁷ Taico Nazaret Zisu a cang tahpaw a thui cangkawleh, “David Pathlah, Zisu, ning pa do ky law!” tatah a thangpoi tah a y.

⁴⁸ Cawngsaw hlupui tah raw he ka, de teitah ung thlang aa tah. Canghrasala, “David Pathlah, ning pa do ky law!” tatah a thang vy tah a y.

⁴⁹ Zisu cawh a daw ka, “Va y tua o,” tatah a tah he.

Taico mehcopaw cawh va y he ka, “Na thawchah seh, a daw! Ama tah a ca y,” tatah aa tah. ⁵⁰ A angkilai cawh vathlang ka, a catho ka, Zisu khaco a va sei.

⁵¹ Zisu taco, “Na cawtah ze tuapah maw na du?” tatah a hae.

Mehcopaw taco, “Cawngpahtu, khuahmuh khy ka du,” tatah a palei.

⁵² Zisu taco, “Sei myca, na zingnah tah a ca dangsah thah,” tatah a tah. Ma cangkaw leco khuahmuh ka, Zisu a seinah lang khah a zui.

11

*Rungnaw ngetei tah a naenah kong
(Mt 21:1-11; Luk 19:28-40; Jh 12:12-19)*

¹ Jerusalem lang a va nae myca he ka, Oliv tlaang letah a ungpaw Bethfes le Bethani khua aa phah tihtah Zisu tah a hningzuitu pahning khah a seisah hlang he. ² Aa hai letah, “Naa hme khua

lekhei va seí la, khuachung naa nae cangkawleh he ceh ahotahmai aa ke bang lypaw la teitei a hrai thlangpaw khah naa hmuh a. A rui khah thlang he ceh ka, ma lang heh naa va hrui a. ³ Pakheh kheh tah, ‘Ze rua tamaw ma hrakhei naa tua?’ aa ca tah caco he, ‘Abuipaw tah a hia, ma lehei a va chia kaw palang a,’ tatah tah my lo,” a tah he.

⁴ Mataico va seí he ka, langpui kae letei ing a hawkaw tung letei aa hrai thlangpaw, la teitei cawh aa hmuh. ⁵ A rui aa thlang ning takhei aa kae letei a dawpaw sahlo tah hmuh he ka, “Zemaw la teitei rui khah naa thlang?” tatah aa tah he. ⁶ Zisu tei a chingpaw he hrakhei chai he ka, cawngsaw sahlo taco seikhui thlang o, aa tah he. ⁷ La teitei cawh Zisu kung va tlung khui he ka, a cung letah aa pai sahlo dae he ka, Zisu tah a ke. ⁸ Taico cawngsaw hlupui tah langpui leco aa pai sahlo phaw he ka, mehthaikheh cawh lyraang letei chingbu khah va chaw he ka, aa phaw pah hrah. ⁹ Mataico, a hmelang tei a seipaw sahlo le, a hninglang tah a zuipaw sahlo taco,

“Hosana!” Abuipaw ming tei a vongpaw cawh bonghnang song tah ung ky seh.✠

¹⁰ Kaa mapaw, David painah raang, a va tlung leimeipaw cawh bonghnang song tah ung ky seh.

Hosana! A sangcainah vaicung lekhei Khazing cawh reithai tah ung ky seh.”
tatah a y he.

* **11:9** Hosana cawh Hebru rei cang ka, a silang cawh, Pachah,tahnah a cang. ✠ **11:9** Hlaw 118:25-26

¹¹ Zisu cawh Jerusalem khuapui lang a nae ka, behnah ing lang khah a va sei. Zezongpui khah ming ka, canghrasala zailang a cang thah cawtah piathlah kaw ka, a hningzuitu pahrawhluihning khakhei Bethani khua lang aa sei kaw.

Zisu tah behnah ing a longsah

(Mt 21:18-19)

¹² A ningthlamongpaw cawh Bethani khua taitah aa piathlah ning takhei Zisu cawh a ngai a di. ¹³ Langpa tah thuiku kung a bu a chaw ngeteipaw khah va hmuh ka, a thui ung maw tahpaw ming pawtah a va seihno. Canghrasala a va phah tih taco, a thui tih cai a canglynah cawtah a hnaw tah cy ly co zehmai hmuh be. ¹⁴ Mataico thuiku kung khah, “Ahotahmai tah na thui ca e khawh kheh he seh,” tatah a tah. Ma bia a reipaw cawh a hningzuitu sahlo zong tah aa thui.

¹⁵ Zisu cawh Jerusalem khuapui a va phah tihtah behnah ingdung chunglang khah a va nae. Behnah ing letei hming a zuapaw sahlo le a copaw sahlo khah tingchua thlu he ka, tangka a thlaipaw sahlo aa cabuai le thury a zuapaw sahlo aa dyching sahlo khah a palehly thlu he. ¹⁶ Zua ruapaw hming khah behnah ingdung cahrong tah tlelai khah ahohmai sai bei he. ¹⁷ Taico aaning sahlo a cawngpah ning he tah a reipaw cawh, “Capathai letah ma hrahei cia cang bei maw?

‘Ka ing cawh mingphing vytei cawtah

thlawchangnah ing tatah aa tah a.’✧

Canghrasala naaning taco, ‘Mehru kua,’✧ tah naa tua,” a tah he.

¹⁸ Tlangbui macang sahlo le phungbia cawng-pahtu sahlo taco ma bia cawh thui he ka, Ama khah thaw khy nápw langpui hui hrang aa patho. A cawngpahnah takhei ming zawpui aa lung khah tong tu ka, macawtaco Ama khah aa ci.

¹⁹ Zailang a va chua tihtah Zisu le a hningzuitu sahlo cawh khuapui chung taikhei a piathlah he.

Thuiku kung a ro

(Mt 21:20-22)

²⁰ A ningthlamongpaw mongdi tah aa seipai khei thuiku kung cawh a hrang tai a ro thahpaw khah aa hmuh. ²¹ Piter tah a thui thlang cawtah Zisu hai leco, “Cawngpahtu, mingtua, chia na sah-paw thuiku kung kheh a ro thlu thah khi,” tatah a tah.

²² Zisu tah, “Khazing khah zing my lo. ²³ Biahmuisui ka ca ching he. Pakheh kheh tah ma tlaang heh, ‘Sei la, rili chung lang a va thlah,’ tah seh la, lung langlo tah ung lytah a reipaw khah a zing caco, ma hraco tuapah a cang a. ²⁴ Macawtaco ka ca ching he, thlawchang tah naa haepaw khah kaa hmuh thah tatah naa zing caco, ma cawh peh na cang a he ceh. ²⁵ Mataico, thlawchang tah na daw tihtah na cung letei hmingchahly aa tuapaw maikaw khah ngethai la, ma pawsui co vaicung letei a ungpaw na Paw Khazing tah na suanah vytei khah a ca ngethai hrah a. ²⁶ Canghrasala, cawngsaw hringpaw suanah khah na ngethai ly caco, vaicung letei na Paw Khazing tah na suanah khah ca ngethai hrah a be,” tatah a chai.†

† 11:26 Kih cia thaikheh leco cai 26 heh ung be.

*Zisu nawhnuinah khah aa haecakhia
(Mt 21:23-27; Luk 20:1-8)*

²⁷ Jerusalem lang khah va tlung kaw he ka, Zisu cawh behnah ingdung chung letei a khiakaly ning tah tlangbui macang sahlo le phungbia cawng-pahtu sahlo le macang sahlo khah Ama khatah a vong he. ²⁸ Aaning taco, “Ze nawhnuiná tamaw ma hming sahlo heh na tua? Ahomaw ma hming sahlo heh tua pawtah nawhnuinah a ca pei?” tatah aa hae hri.

²⁹ Zisu tah, “Bia sangkheh ka ca hae tua hrá he a. Pa palei la, ma hming sahlo heh zehapaw nawhnuinah tamaw ka tua tahpaw ka ca ching hrá he a. ³⁰ Johan tah baptisma cangsahnah naw a hnuipaw khah vaicung taitah maw, cawngsaw taitah maw? Pa ching tua o,” tatah a palei he.

³¹ Reisia he ka, “Vaicung taitah tah my peh seh la, ‘A cang caco zecawtamaw Johan cawh naa zing be?’ a ma tah a. ³² Canghrasala, ‘Cawngsaw taitah,’ kaa tah a maw?” tatah aa reisia. Aaning tah zawpui khah aa ci he, zemaw tah pawco cawngsaw maikaw tah Johan cawh Khazing khua-vang hmuissui a cang tatah aa tah.

³³ Macawtaco Zisu khatah, “Hnih bei peh,” tatah aa tah.

Zisu tah, “Kama zong tah ma hming sahlo heh zehapaw nawhnuiná tamaw ka tua tahpaw ca ching hra bei neh,” a tah he.

12

*Ly a hlangpaw tawchingnah
(Mt 21:33-46; Luk 20:9-19)*

¹ Taico Zisu tah tawchingnah bia tah a ching he. “Cawngsawpaw pakheh tah misur buichung a tua. A buichung cawh ruahy sahkhai ka, misur so nápw kho zong co ka, a haw nápw siasang zong a do thah. Mataico misur buichung cawh male khah hlei he ka, khuatlongnah lang a sei.

² Hre cai a cang tih taco a sae pakheh khah ama a tinghangpaw pakhong paw takhei ly a hlangpaw sahlo khaco a taw. ³ Canghrasala aaning taco ama cawh tle he ka, dai he ka, kih longpaw tah aa kawsah kaw. ⁴ Taico, a sae hringpaw taw kaw ka, ma cawngsawpaw cawh a lu letah phong he ka, ningzaw chuipaw tah aa tua. ⁵ A sae hringpaw taw kaw hui ka, ama zong cawh aa thaw. Ahringpaw sae sahlo khah a hlu vy tah taw he ka, thaikhehpaw cawh dai he ka, thaikhehpaw cawh aa thaw he.

⁶ Taw ruapaw pakheh suipaw a hnui myca. Ma cawh a dopaw, a sawcapaw khah a cang. ‘Ka sawcapaw cawh aa cizaw a,’ tah ka, a changnah leco a sawcapaw cawh a taw.

⁷ Canghrasala, ly a hlangpaw sahlo taco, ‘Ma cawngsaw heh ry cytu a cang. A vong la, thae he peh, taico a ry heh kaa cawtah cang ná seh,’ tatah pakheh le pakheh aa tah he. ⁸ Taico, ama cawh tle he ka, aa thaw khy taitah misur buichung alailang khah aa vathlang.

⁹ Ma tih taco misur buichung a hnuitupaw takhei zemaw a tua a? Va sei ka, ly a hlangpaw sahlo khah thé he ka, misur buichung khah ahringpaw khah a hlei he a. ¹⁰ Capathai letah rei bang bei he ceh maw?

‘Ing a sahtu sahlo tei aa hlawhpaw alung cawh

a biapui caipaw alung tah a cang.

¹¹ Abuipaw tah ma heh a tuapaw cang ka,
kaa mehmuh letah khuarawha a chuipaw a
cang, ☆
a tahpaw khasaw,” tatah a tah he.

¹² Taico, Juda hotu sahlo taco Ama tle nápaw
langpui khah aa hui, zecawtamaw tatah tawch-
ingnah bia a reipaw cawh aaning a rei hnopaw he
a cang takhah aa hni. Canghrasala zawpui khah
aa cinah caw he tah Ama cawh aa seisaï kaw.

Sizar khatah ngungkhui pehnah kong
(Mt 22:15-22; Luk 20:20-26)

¹³ Ma khy taico, Ama a bia khei Zisu khah
tle pawtah Farasi sahlo le Herod a hningzuitu
mehthaikheh khah aa taw he. ¹⁴ Zisu khaco a vong
he ka, “Cawngpahtu, nama cawh zingchuipaw na
cangpaw kaa hni. Cawngsaw tah miamang khy-
paw cang bei ceh, zecawtamaw tatah cawngsaw
hme ming bei ceh. Canghrasala Khazing langpui
khah biahmuisui a cang naning teitah na cawng-
pah tei he. Siangpahrang Sizar letah ngungkhui
peh heh ahmang maw hmang ly? ¹⁵ Kaa pé maw,
pé ly?” tatah aa hae.

Canghrasala Zisu tah cungmai raipha aa cang-
paw khah a hmuh tihtah, “Zecawtamaw o na pa
pachia he ceh? Denari tangka cawh va tle la, pa
mingsah tua o,” a tah he. ¹⁶ Tangka cawh va tle
he ka, “Aho lingthlaw maw a cawng? Aho cakhai
maw a cia?” tatah aaning sahlo cawh a hae he.

Aaning tah, “Sizar,” tatah aa palei.

☆ **12:11** Hlaw 118:22-23

¹⁷ Taico Zisu tah aa hai letah, “Sizar a tei cawh Sizar khah pei la, Khazing a tei cawh Khazing pei my lo,” tah he ka, aaning sahlo cawh aa ning aa ang ngetei.

*Thokawnah letah nupui le nuwaw a hnuinah
(Mt 22:23-33; Luk 20:27-40)*

¹⁸ Ma khy taico, thokawnah ung be a tahpaw Sadusi sahlo cawh Zisu khatah a vong he ka, bia aa hae hri. ¹⁹ “Cawngpahtu, Moses phungbia letah cawngsawpaw cawh sawtei sah lytah a nupui khah a thih sai caco, a unypaw takhei lahmene cawh nupui tah chui kaw seh la, a thipaw caw takhei sawtei sahlo a sah pápaw a cang a tah. ²⁰ Uikheh cawh uny pasarih ung he ka, a uthui caipaw tah nupui chui ka, sawtei sah lytah a thi. ²¹ A pahningnahmaw tah ma lahmene cawh chui kaw ka, canghrasala sawtei sah lytah a thih sai hrah. A pathungnahmaw zong ma hraco a cang hrah. ²² Aa pasarih co cawngsawno cawh chui he ka, sawtei sah lytah a thi he. A hning cai tah ma canuno zong cawh a thi hrah. ²³ Macawtaco thokawnah letah ma canuno cawh aho a nupui maw a cang a? Aa pasarih tah ma canuno khah aa chui tung,” aa tah.

²⁴ Zisu taco, “Naa rawh sua ngetei, Capathai a cang ly le Khazing hmingtuakhynah naa hnilynah cawtah a cang. ²⁵ Aa thipaw aa tho kaw tih taco, a chuihae cawh ung khawh a be. Vaicung letei vaiming hratah aa cang tae he a. ²⁶ Mehthi sahlo thokawnah kong leco Moses cabu letei chingbu me tah a kangpaw kong lekhei Khazing tah, ‘Kama cawh Abraham Khazing, Isak Khazing, Jakob

Khazing ka cang,'☆ tатаh a таhpaw khah rei bang bei he ceh maw? ²⁷ Ama cawh mehthi aa Khazing cang be, canghrasala mehring aa Khazing a cang hri. Naa rawh sua caimang!" tатаh a palei he.

Biapеh alaicaipaw

(Mt 22:34-40; Luk 10:25-28)

²⁸ Phungbia cawngpahtu pakheh a vong ka, ma hratei bia a ei leimeipaw he khah a thui. Zisu tah achaw teitah a palei he таhpaw khah a hmuh tihtah, "Biapеh vytei hrong lehei zehapaw maw a biapui cai?" tатаh a hae.

²⁹ Zisu tah, "Biapеh a biapui caipaw cawh ma heh a cang, 'Israel cawngsaw sahlo nawthlia tua o. Abuipaw suipaw heh Khazing cang ka, Khazing ahringpaw ung bei he. ³⁰ Abuipaw na Khazing khah na lungthing vytei, na hringnah vytei, na khuarawnah vytei, na thawzaang vytei tah do my lo.'☆ ³¹ Taico a sanghningnah cawh, 'Nama na dopaw hratah na ingpaw khah do my lo,'☆ tah a cang. Ma sanghning navy hei alai vypaw biapеh ung be," tатаh a chai.

³² Phungbia cawngpahtu tah, "Cawngpahtu, a chah ngetei, Abuipaw suipaw heh Khazing cang ka, Khazing ahringpaw ung bei he na таhpaw heh a hmangpaw a cang. ³³ Khazing khah na lungthing vytei, na hnithainah vytei, na thawzaang vytei tah do la, na ingpaw khah nama na dopaw hratah do cawh mero pehlainah vytei le, thuihlainah vytei navy tah biapui vy a cang," tатаh a palei.

☆ 12:26 Piachua 3:6 ☆ 12:30 Biary 6:4-5 ☆ 12:31 Tlangbui 19:18

³⁴ Zisu tah ma cawngsawpaw tei, singvang ngetei tah bia a paleipaw cawh a hmuh tihtah, “Khazing painah raang khatah a hlah bei ceh,” tatah a tah. Ma khy taico ahotahmai tah bia hae ngang khawh bei he.

Khri cawh aho sawcapaw maw

(Mt 22:41-46; Luk 20:41-44)

³⁵ Zisu tah behnah ingdung letei a cawngpah ning he takhei, ma bia heh a hae he. “Zecawta-maw phungbia cawngpahtu sahlo tah Khri cawh David pathlah a cang tatah aa tah? ³⁶ David tah Thlawpaw Pathai tei a reipaw cawh,

‘Abuipaw tah ka Buipaw cawh,
na carae sahlo khah na phe rai
letah ka chia hlai vytei he cawh

ka cacang lang letah a ty my lo a tah,’[☆]
tatah a tah. ³⁷ David ama ceingei tah, ‘Abuipaw,’
a tah tlung, zekhatamaw Khri cawh David sawcapaw a cang thai a?” tatah a tah he.

Ming rungpoi taco a bia cawh lungtho teitah aa nge thlang.

³⁸ Ma hrarei Zisu tah a cawngpah ning he takhei, “Phungbia cawngpahtu sahlo khah a raering my lo. Aaning cawh a ngepaw angki pasuapaw a hrei tah chodo tlaang letah a khia lai le cawngsaw tah cizaw hmotah bia a ching khah aa du. ³⁹ Synagog letah achaw caipaw dyching letah a ty du he ka, kawngchuanah letah achaw caipaw hminghmaw khah aa du. ⁴⁰ Lahme sahlo ing khah chu he ka, zawpui hmuh rua tah a sypui tah thlaw aa chang.

[☆] 12:36 Hlaw 110:1

Ma sahlo cawh a sah caipaw dangtahnah aa ing tae a,” a tah he.

Lahmeno a chiapaw tholong

(Luk 21:1-4)

⁴¹ Zisu cawh behnah ing lekhei tholong thingkawng lang a hui khei a ty ka, zawpui vytei tah tholong aa chia leimeipaw khah a ming thlang. A hnuirungpaw mehlupui tah tangka hlupui khah tholong kawng leco aa thlah.

⁴² Canghrasala mehsisah lahmemo pakheh cawh a vong ka, tholong kawng leco phaesai phaehning, tangka phaekheh mai tluih a cangpaw tei cawh a thlah hrah.

⁴³ Taico Zisu tah a hningzuitu sahlo khah y he ka, “Biahmuisui ka ca ching he, ma mehsisah lahmemo tahei aho navy zong tah a hlu vy tholong a thlah. ⁴⁴ Ahringpaw cawh aa hnuipaw a hluipaipaw chung taikhei aa peh. Canghrasala ma lahmemo heh cawh a dongchia hmotah a hringnah cawtei a hnuipaw vytei a peh thlu hi,” a tah he.

13

Chai changnah paching pakhanah

(Mt 24:1-21, 29-35; Luk 21:5-33)

¹ Taico Zisu cawh behnah ing taitah a piathlah ning takhei, a hningzuitu pakheh tah, “Cawng-pahtu, mingtua hmai! Alung sahlo aa lai zia kkeh! Ing sahlo aa rungnaw zia kkeh!” tatah a tah.

² Zisu taco, “Ma ing rungnawpaw vytei heh na hmuh maw? Alung phaekheh hmai heh palehly lypaw ung a be, a zongmingtei tah palehly thlu a cang tae he a,” tatah a palei.

³ Zisu cawh behnah ing raechai tlaang, Oliv tlaang cung letah a ty thlang ning takhei, Piter le Jeims le Johan le Andru takhei Ama khah, ⁴ “Ma hming sahlo cawh zening tamaw a cang a? Taico, zehapaw paching pakhanah maw a ung a tahpaw ma ching tua?” tatah a paruh teitah aa hae hri.

⁵ Zisu taco aa hai letah, “Ahotahmai aa ca dungkhei ly ná paw he tah a raering my lo. ⁶ Ka ming tah cawngsaw hlupui va chua he ka, ‘Kama heh Ama cawh ka cang,’ tah a he ka, cawngsaw hlupui khah aa dungkhei he a. ⁷ Rae a dypaw he le rae thongpang naa thui tihtah a pahly khe lo. Ma hming sahlo cawh a ung hrahripaw a cang he. Canghrasala, a changnah cang balang be. ⁸ Raang kheh le raang kheh a dy a he ka, painah le painah a dy he a. Hming hlupui letah aling a hrui a ka, cakaang a tlung a. Ma vytei heh canu ny ung risaw hrang a pathonah hratah a cang.

⁹ Achaw teitah a raering my lo. Ca tle a he ka, biacenah letah aa ca chuakhui tae he a. Synagog letah zong aa ca chei he a. Uhtu bui sahlo le siangpahrang sahlo hme letah bia hnihtu cang pawtah kama ka rawng tah na daw tae a he ceh.

¹⁰ Canghrasala ma hming sahlo a cang hlai tahei thawngchawbia heh mingphing vytei khatah rei taw a cang a. ¹¹ Ca tle a he ka, biacenah hme letah aa ca chuakhui tih he tah ze bia maw kaa rei a tahpaw pacang tah naa thlawzawng kheh seh. A cai a phah tihtah rei ruapaw cawh peh cang tae he ceh ka, ma cawh rei thlang my lo. Zecawtamaw tatah ma bia a reipaw cawh naaning cang lytah Thlawpaw Pathai khah a cang hri a.

¹² Uny le uny, paw le saw sahlo cawh thihnah

tai a luithae he a. Sawtei leh tah no le paw khah thihnah tai aa dy he a. ¹³ Kama ka rawng tah ming vytei tah aa ca hua he a, canghrasala, a changnah tai zingnah letah cy ky tah a dawpaw cawngsaw cawh pachah a cang a.

¹⁴ ‘Rorangnah a chua khuipaw pasih padawh chuipaw,’[☆] cawh hming pathai letah a daw thlangpaw khah naa hmuh tihtah a reitu tah a silang hnih he seh. Judia raang letei a ungpaw cawngsaw sahlo cawh tlaang cung lang sai he seh. ¹⁵ Ing cung letei a ungpaw cawh hmingbo lá pawtah ing chunglang a nae kheh seh. ¹⁶ Ly letei a ungpaw cawh a angkilai lá pawtah a ing lang tlung hrah kheh seh. ¹⁷ Ma ningcai cawh sawtei a phopaw canu sahlo le nysai a tlepaw no sahlo aa caw taco zetlua tamaw ningping a chui a! ¹⁸ Ma hming sahlo heh thlasih chung tah a cang ly ná pawtah thlawchang my lo. ¹⁹ Zecawtamaw tatah Khazing tah khazaw a tua thoning taitah atoning tai lehei a ung bang lypaw ningping vaisangnah cai cang tae a ka, ma tluh hapaw cawh ung bang khawh a be. ²⁰ Ma ning sahlo cawh Khazing tah pachingsah lytah ung my seh la, ahringpaw pakheh hmai ung a bei he. Canghrasala a thingpaw a cawngsaw sahlo rawng tah ma ning sahlo cawh a pachingsah a. ²¹ Ma tih taco, pakheh kheh tah, ‘Mingtua, ma lehei Khri a ung,’ a cang ly leh, ‘Ming tua, ma lekhei a ung khi!’ aa ca tah caco he zing khe lo. ²² Zemaw tahpaw co Khri pakheipaw sahlo le khuavang pakheipaw sahlo chuh a he ka, a cang khy caco Khazing thingpaw cawngsaw

☆ **13:14** Dan 9:27; 11:31; 12:11

sahlo hmai dungkhei pawtah paching pakhanah
sahlo le ningang chuipaw hming sahlo khah aa
tua a. ²³ Macawtaco a raering my lo, a cai a phah
hlai tah zezong ka ca ching pacia he.

²⁴ Canghrasala, ma hanah le reithuinah cai khy
taico,

‘Ning cawh muisah cang a ka,
thlawpaw zong khai khawh a be.

²⁵ Esi sahlo zong avai taitah tlah a he ka,
avai letei hmingtuakhynah sahlo zong cah-
neh a cang he a.’☆

²⁶ Ma tih taco, Cawngsaw Sawcapaw cawh
hmingtuakhynah le rungnawnah khatah meding
hrong letah a vongpaw khah cawngsaw tah aa
hmuh tae a. ²⁷ A vaiming sahlo cawh taw he ka, a
thingpaw sahlo cawh alui ki kipali taitah le, alui a
changnah taitah avai sahlo aa changnah tai khah
aa pahmo he a.

²⁸ Thuiku kung tai hei cawngpahnah bia heh a
ngia my lo. A chawng ka chawng katei, a hnaw
pany a ka chuapaw naa hmuh tihtah nipui ning
a ne myca tah naa hni. ²⁹ Ma hraco, ma hming
vytei heh a cang leimeipaw naa hmuh tihtah cai a
nae myca, ingkaw hrang a va phah myca tahpaw
khah hnih my lo. ³⁰ Biahmuisui ka ca ching he, ma
hming vytei heh a tlung hlai vytei cawh atochai
cawngsaw sahlo heh thi thlu balang bei he. ³¹ Alui
le avai cawh a rawh a, canghrasala, ka bia cawh a
rawh by a be,” tatah a tah he.

A cai le ning ahotahmai hnih bei he
(Mt 24:36-44)

☆ **13:25** Isai 13:10; 34:4

³² Taico a rei vypaw cawh, “A ning le a cai cawh Paw tah cy ly co ahotahmai hnih bei he, vaicung letei vaiming sahlo tahmai hnih bei he, Sawcapaw zong tah hnih hrah be. ³³ A raering my lo. A mai pacia my lo! Ma cai cawh zening tamaw a cang a tahpaw hnih tlung bei he ceh. ³⁴ Cawngsaw khua a tlawngpaw khatah a lo. A ing khah seisai ka, a sae sahlo khah aa hre ruapaw rai cacy khah a ching si he. Ingkaw a congtpaw khah achaw teitah za vai my lo tatah bia a patai si.

³⁵ Macawtaco, a raering my lo, zecawtamaw tatah ing a hnuitu cawh zailang letah maw, zaic-ing letah maw, aakhawng tamaw, mongdi tamaw, zening tamaw a va kawkaw a takhah hnih tlung bei he ceh. ³⁶ Rawh ly pui tah a va tlung caco na ih-ning thlangpaw khah ca hmuh pang le. ³⁷ Naaning khatei ka reipaw heh ming vytei khatah ka reipaw a cang. A raering my lo!” tatah a tah he.

14

Bethani khua letah Zisu sathy thunah

(Mt 26:1-16; Luk 22:1-6; Jh 11:45-53; 12:1-8)

¹ Khungsai Panawnah le Raangri phi lypaw Very Panawnah cawh ninghning suipaw a du tihtah tlangbui macang sahlo le phungbia cawngpahtu sahlo taco Zisu cawh aparuh teitah tle tah thaw napaw khua khah aa khang. ² “Canghrasala, Khungsaipanaw chung leco cang kheh seh, cawngsaw tah hnahnawhnah aa tua sua a,” tatah aa tah.

³ Zisu cawh Bethani khuapaw, Simon mehthingmui ing letah batui a e leimei ning

takhei canu pakheh a vong ka, lungrang tuithei khei, sathy ringthopaw, a mai a ru ngeteipaw a va tle. Ma sathy ringthopaw cawh nard thingkung taitei lahpaw nard a patahpaw taitah tuapaw a cang. Tuithei cawh khuichy ka, Zisu lu leco sathy cawh a bia.

⁴ Ma letei a ungpaw mehthaikheh cawh aa thin-gae ngetei ka, “Zecawtamaw ma tluh a mai a rupaw sathy heh a patlawh a papang? ⁵ Mehnung pakheh kung kheh hlo* navy tah a hlu vy tahmai zua seh la, ma tangka cawh mehsisah pei he seh la, chah vy bei maw?” aa tah. Taico, canuno cawh a sah pui tah aa raw.

⁶ Zisu tah, “Ama tua tah tua thlang seh, ze-cawtamaw ama cawh hna naa hnawh? Ka cung letah a tuapaw heh hmingchaw a cang. ⁷ Mehsisah cawh naaning khatah ung paria thlang he ka, naa du caco zening tahmai naa bong khy thlang he. Canghrasala kama cawh ung paria bei neh. ⁸ Ka pung cung letei sathy a pa biapaw heh a tua khy pawtei khah a tuapaw a cang. Phung ka cang nápaw cawtah a pachia hlangpaw a cang. ⁹ Biahmuisui ka ca ching he, khazaw letah thawngchawbia aa reinah maikaw letah ma cawngsawno tei a tuapaw heh ama monghly ly-nah tah rei a cang tae hrá a,” a tah he.

¹⁰ Mataico, a hningzuitu hluihning letei pakheh a cang hrah paw Judas Iskariot cawh tlangbui macang sahlo khatah Zisu cawh luithae pawtah a va sei. ¹¹ Ma kong cawh aa thui tihtah aa thawchah ngetei ka, tangka kaa ca pae a aa tah.

* **14:5** Kung kheh hlo cawh, Denari 300,a cang.

Macawtaco, Judas cawh aaning khatah Zisu a peh khy nápw he cai chaw khah a bo thlang he.

Abuipaw zairia

(Mt 26:17-30; Luk 22:7-23; Jh 13:21-30)

¹² Raangri phi lypaw Very Panawnah ning a hmetawpaw, Khungsai Panawnah Tuu teitei thuihlainah ning leco, a hningzuitu sahlo tah Zisu cawh, “Zeletamaw Khungsai Panawnah zairia enah cawh na cawtah pachia he peh seh la, tah na du?” tatah aa hae.

¹³ Macawtaco, a hningzuitu pahning cawh taw he ka, “Khuapui chung a va nae la, beirai tah tui a cuilaipaw capaw pakheh langpui letah naa tong he ceh. Ama cawh zui my lo. ¹⁴ Ma cawngsaw a naenahpaw ing a hnuitupaw khah, ‘Cawngpahtu tah ka hningzuitu sahlo khatah Khungsai Panawnah zairia kaa e nápw, ka mehlai khang cawh zeletamaw a ung a tah,’ tatah naa hae a. ¹⁵ Ama taco, a cung khang a kypaw pui, achaw teitah tingtua ciapaw a ca hmuh sá he a. Ma leco kaa dawngkasawny cawtah va tingtua my lo,” a tah he.

¹⁶ Taico, a hningzuitu cawh va seí he ka, khuapui chunglang cawh a va nae he ka, Zisu tah a ching pawtei he hrakhei hming sahlo cawh aa va hmuh. Macawtaco Khungsai Panawnah zairia cawh aa pachia.

¹⁷ Zailang leco Zisu cawh a hningzuitu pahrawhluihning khakhei a vong he. ¹⁸ Cabuai cawh cadung he ka, batui aa e leimeining takhei Zisu tah, “Biahmuisui ka ca ching he, naa hrong

tai hei pakheh, kama khatei batui a e hrah paw tahei a pa lui a,” tatah a tah.

¹⁹ Aa dawngkasawny co aa ngechia ngetei ka, pakheh khy pakheh tah, “Kama cang hrah ring bei neh?” tatah aa tah.

²⁰ Zisu taco aa hai letah, “Naaning hluihn-ing chung lehei pakheh kama khatah pakang kangkheh letah very a e hrah paw heh a cang a. ²¹ Cawngsaw Sawcapaw cawh Capathai tah a kong a ci paw hratah a cung letah a tlung a. Canghrasala, Cawngsaw Sawcapaw a luipaw cawngsaw cawh a cing a ping! Za pi lytah ung seh la, a cawtah a chah vy hripaw,” tatah a palei he.

²² Aa e chung taco, Zisu tah very khah law ka, lawngbia a hlai khy taitah kychy ka, a hningzuitu sahlo cawh pei he ka, “Law la e my lo, ma heh ka pung a cang,” tatah a tah.

²³ Ma khy taico ny cawh law ka, lawngbia a hlai khy taikhei hlai he ka, aa zongmingtei tah ma ny taico aa ding.

²⁴ Taico Zisu tah, “Ma heh ming hlupui cawtah a laipaw ka thisai, biahrai thapaw cawh a cang.

²⁵ Biahmuisui ka ca ching he, Khazing painah raang letah a thapaw tah ka ding hlai vytei cawh misurhang heh ding khaw bei neh,” a tah he.

²⁶ Reithainah hlaw sungkheh aa sah khy taitah Oliv tlaang lang aa ke.

*Piter a paphah ná paw kong Zisu tah a rei
(Mt 26:31-35; Luk 22:31-34; Jh 13:36-38)*

²⁷ Zisu tah aa hai letah, “Naa dawngkasawny tah na pa paisai thlu he ceh, zecawtamaw tatah ma hrahei Capathai letah cia a cang.

‘Kama tah tuukingtu khah chei a neh ka,
tuu vytei cawh a paipatlau thlu he a,’[☆]
a tahpaw hrakhei. ²⁸ Canghrasala, ka thokaw
taitah naaning naa hme lang tah Galili raang lang
ka seihlang a,” a tah he.

²⁹ Piter taco, “Aa zongmingtei tah ca paisai thlu
hmai he seh la, kama cawh ca seisai by bei neh,”
tatah a tah.

³⁰ Zisu tah, “Biahmuisui ka ca ching, ato zai lalei
lehei aa uihning a khawng hlai letah uithung tai
na pa paphahsai a,” tatah a chai.

³¹ Taico Piter taco, “Nama khatah ka thih hrápaw
a cang zong tah ca paphah sai by a bei neh,” tatah
a tah vy. A hningzuitu vytei zong tah ma hraco aa
tah hrah.

Gethsemani buichung

(Mt 26:36-46; Luk 22:39-46)

³² Gethsemani aa tahpaw hminghmaw lang
cawh sei he ka, Zisu tah a hningzuitu sahlo hai
leco, “Thlaw ka chang kaa letah ma lehei a za ty
thlang my lo,” a tah he. ³³ Piter le Jeims le Johan
cawh Ama khatah a chui he ka, lung reithui le
vaisang tah a ung. ³⁴ Aa hai letah, “Ka hringnah
heh thih khui khypaw ngechianah khatah a chih.
Ma lehei ung thlang la, a raering my lo,” a tah he.

³⁵ Aa hmelang a cawngpe va sei vy ka, alui letah
a bawh ka, a cang khy caco, ma tai-ingnah cai
tahei pa khungsai ky seh, tatah thlaw a chang.

³⁶ Zisu tah, “Abba, Apaw, nama na caw taco ze-
zong a cang khy thlang. Ma tai-ingnah ny heh
kama taitah lawhly thlang. Canghrasala, kama ka

[☆] 14:27 Zeka 13:7

dunah hratah cang lytah nama na dunah hratah cang ky seh,” tatah thlaw a chang.

³⁷ Taico, a hningzuitu sahlo khaco a vong kaw ka, aa za ihning thlangpaw khah a hmuh. Piter hai letaco, “Simon, na ihning maw? Suimehlang pakheh hmai a raering teitah ung khy bei ceh maw? ³⁸ Tuhsonah chung lang naa tlah ly nápwatah a raering la, thlawchang my lo. Thlawpaw taco ahmangpaw hming tua cawh a du thlang, canghrasala pungsaw duitei cawh a thaw a dia,” tatah a tah.

³⁹ Va sei kaw ka, ma thlythly hraco thlaw a chang kaw hui. ⁴⁰ A va kaw kaw tihtah aa ihning thlu thlangpaw khah a hmuh, zecawtamaw tatah aa meh ku tu ka, ceh bei he. Zehratamaw bia kaa chai a tahpaw hmai hnih bei he.

⁴¹ A uithungnah letah a vong kaw hui ka, aa hai leco, “Ato tingtai heh maw a ih he ceh ka, naa hia thlang he ceh? A zaw myca! A cai a phah myca! Mingtua o, Cawngsaw Sawcapaw cawh mehsua sahlo kih letah hlai a cang myca. ⁴² Tho tua o! Sei he peh! A pa luitupaw cawh a va chuh myca hi!” a tah he.

Zisu aa tle

(Mt 26:47-56; Luk 22:47-53; Jh 18:3-12)

⁴³ Ma hrarei bia a rei leimei ning taco a hningzuitu hluihning chung letei pakheh a cangpaw Judas cawh a va chuh. Ama khatah tlangbui macang le phungbia cawngpahtu le macang sahlo tei aa tawpaw he cawngsaw rung cawh zyzi le thingtai a tle he ka, a va chuh hrah he.

⁴⁴ A luitupaw taco aaning cawh, “Ka hnanpaw khah Ama cawh a cang a, tle la, a vaitu sahlo

khatah seikhui my lo,” tatah paching pakhanah a peh pacia thah he. ⁴⁵ Zisu khaco a vaw palang ka, Judas tah, “Cawngpahtu,” tatah y ka, a hngang. ⁴⁶ Cawngsaw sahlo taco Zisu cawh aa tle. ⁴⁷ Mataico, ma letei a daw thlangpaw pakheh taco a zyzi cawh a chua ka, Tlangbui alaicaipaw a saecapaw a naw khah tuh ka, a pathai thlah.

⁴⁸ Taico Zisu tah, “Rae a thopaw sahlo hotu ka cangnah caw tamaw tle pawtah zyzi le thingtai tah naa pa seihno? ⁴⁹ Ning tating tah naaning khatah ung neh ka, behnah ingdung letah zong cawngpah he neh ka, naa pa tle tlung be. Canghrasala, ma hrahei a cangpaw cawh Capathai bia patling a hy cawtah a cang,” tatah a tah. ⁵⁰ Taico aa dawngkasawny tah Ama cawh hningchai he ka, aa saisai thlu.

⁵¹ Taico satle pakheh paithladih sui a buhpaw takhei Zisu cawh a zuilai. Ama cawh aa tle tihtah, ⁵² a pai cawh thlethlah si ka, a tahlong teitah a sai.

Sanhedrin khongsil sahlo hme letah Zisu aa chua khui

(Mt 26:57-68; Luk 22:54-55, 63-71; Jh 18:13-14, 19-24)

⁵³ Zisu cawh tlangbui alaicaipaw ing lang khah seikhui he ka, ma leco tlangbui macang vytei le macang sahlo le phungbia cawngpahtu sahlo khah a va chuh hrui he. ⁵⁴ Piter tah langhlaw pui tah Ama cawh zuilai ka, tlangbui alaicaipaw ingdung chung taikhah a zuilai. Ma leco raevai sahlo khakhei me a ai ka, a palung.

⁵⁵ Tlangbui macang sahlo le Sanhedrin khongsil vytei taco, Zisu aa thaw khy nápawtah a suanah

khah hui he ka, canghrasala zehmai hmuh bei he. ⁵⁶ Cawngsaw hlupui tah hing le he tah Zisu reipachianah khah rei he ka, canghrasala pakheh le pakheh aa reipaw khah a lo tlang be.

⁵⁷ Taico thaikhehpaw cawh a daw he ka, Zisu kong letah ma hingbia heh rei he ka, ⁵⁸ “A reipaw kaa thuihpaw cawh, ‘Ma behnah ing cawngsaw tei sahpaw heh chehthlah a neh ka, ningthung chung letah cawngsaw tah sah lypaw ka padaw kaw a,’ a tah,” tatah hing bia cawh aa rei. ⁵⁹ Canghrasala, pakheh le pakheh aa bia cawh a lo tlang hlui be.

⁶⁰ Mataico, tlangbui alaicaipaw cawh aa hme letah a daw ka, Zisu hai letah, “Aa bia heh palei bei he ceh maw? Ma cawngsaw sahlo tei sua aa ca pupaw heh zemaw a cang?” tatah a hae.

⁶¹ Canghrasala Zisu cawh de teitah a ung thlang.

Tlangbui alaicaipaw taco, “A laisuipaw Khazing Sawcapaw Khri cawh na cang maw?” tatah a hae vy.

⁶² Zisu taco, “Ka cang, taico Cawngsaw Sawcapaw heh Cungnungcai Khazing cacang lang letah a ty ka, avai meding cung letah a vongpaw khah na hmuh a,” tatah a tah.

⁶³ Tlangbui alaicaipaw cawh a chaichi khah hriachy ka, “Hnikhuitu ahringpaw kaa hia khawh maw? ⁶⁴ Khazing a reipachianah cawh naa thui thlang myca kho. Zekhatamaw naa rawh?” a tah he.

Aa dawngkasawny co thaw tlang a tlah aa tah.

⁶⁵ Ma khy taico, mehthaikheh tah Zisu cawh aa ci tah chawh he ka, a meh pamai he ka, aa kia tah aa cabai. “Ahomaw a ca cabai, ma ching tua!” tatah

aa tah. Taico raevai sahlo taco Zisu cawh seikhui he ka, aa tuh.

Piter tah Zisu a paphah sai

(Mt 26:69-75; Luk 22:56-62; Jh 18:1-18, 25-27)

⁶⁶ Piter cawh ingdung chung letah a ung thlang ning taco, tlangbui alaicaipaw ing letei rai a hrepaw sae canu cawh a kae lang a vong. ⁶⁷ Piter cawh me a ai thlangpaw khah a hmuh tihtah va mingchai ka, “Nama zong heh Nazaret Zisu khatei a ungteipaw na cang hrah,” tatah a tah.

⁶⁸ Canghrasala Piter tah a paphah ka, “Zemaw na rei tahpaw hnih bei neh, thuithai hrah bei neh,” tatah tah ka, hawkaw lang khah a sei.[†]

⁶⁹ Ma sae canu taco va hmuh kaw hui ka, a kaekang letei a daw thlangpaw he sahlo aa hai leco, “Ma cawngsawpaw heh aa hrong leteipaw pakheh a cang hrah hi,” tatah a tah. ⁷⁰ Piter cawh a paphah vy hui.

A cawngpe khy lekhei ma letei a dawpaw sahlo takhei Piter cawh, “Nama heh aa hrong leteipaw na cang ceingei. Zemaw tah pawco Galili cawngsaw na cangnah cawtah,” tatah aa tah.

⁷¹ Taico Piter tah chia a sah ka, “Ma cawngsaw naa reipaw heh ka hnipaw cang hrahing be,” tah ka, bia a kang.

⁷² Ma cangkawleh leco aa cawh a uihningnah a khawng. Taico Piter cawh Zisu tah a hai letei bia a reipaw, “Aa uihning a khawng hlai tah uithung na pa paphahsai a,” a tahpaw khah a thui kaw. Taico a ngechia ka, otlili tah a cah.

[†] **14:68** Kih cia thaikheh leco, Taico aa a khawng, tahpaw a cia chi.

15

Zisu cawh Pilat hme letah aa chuakhui
(Mt 27:1-2, 11-26; Luk 23:1-5, 13-25; Jh 18:28-19:16)

¹ Mongdi taco, tlangbui macang sahlo le, macang sahlo le, phungbia cawngpahtu sahlo le, Sanhedrin khongsil vytei cawh bia cawh aa pathluh. Zisu cawh tongchai he ka, raang uhbui Pilat khatah aa hlai.

² Pilat taco, “Juda cawngsaw aa siangpahrang cawh na cang maw?” tatah a hae.

Zisu tah, “A cang, na reipaw hraco a cang,” tatah a palei.

³ Tlangbui macang sahlo taco Zisu cawh a phingphing tah sua aa pu. ⁴ Pilat taco a hai letah, “Aaning khah bia paleh a bei he ceh maw? Aa ca pupaw vytei heh ming tua hmai!” tatah a hae vy.

⁵ Canghrasala Zisu kaw kkeh hmai palei be. Pilat cawh a khuarawh a haa ngetei.

⁶ Khungsai Panawnah lehei ming zawpui tei chuasah aa dupaw thongtla pakheh cawh raang uhbui tah a thlaw pah tei he. ⁷ Cawngsaw pakheh Baraba aa tahpaw, rae a tho ning tah lee a nongpaw sahlo khatah a pahlawh hrahpaw cawh thong-ing chung letah a ung. ⁸ Zawpui sahlo cawh a vong he ka, tuateipaw phung hratah tua pá pawtah Pilat khah aa hae.

⁹ Pilat taco, “Juda cawngsaw aa siangpahrang heh ma thlawpah seh tah naa du maw?” tatah a hae he. ¹⁰ Hnachuanah rawng tah tlangbui macang sahlo taco Zisu cawh ama khatah aa va chuakhui tahpaw khah a hni thlang.

¹¹ Canghrasala tlangbui macang sahlo taco

zawpui sahlo cawh Baraba ma chuapah hri tatah rei pawtah aa pasy he.

¹² Taico Pilat taco, “Juda cawngsaw aa siangpahrang naa tahpaw heh saw zekhatamaw ka tua a?” tatah a hae he.

¹³ Zawpui vytei taco, “Khraws letah khaipai thlang!” tatah a y he.

¹⁴ Pilat taco, “Ze rawng tamaw? Ze hmingsua maw a tua?” tatah a hae he.

Canghrasala zawpui taco, “Khraws letah khaipai thlang ky,” tatah a thang vy tah a y vy he.

¹⁵ Zawpuipaw lungtlingsah a dunah cawtah Baraba cawh thlawpah he ka, Zisu cawh chei sah he ka, khraws letah khaipai pawtah Zisu khah raekeh sahlo khatah a hlai he.

*Raekeh sahlo tah Zisu aa pasi a pasa
(Mt 27:27-30; Jh 19:2-3)*

¹⁶ Zisu cawh raekeh sahlo tah abui ing Praetorium aa tahpaw ingdung chunglang seikhui he ka, raekeh sahlo cawh aa dawngkasawny tah aa pahmo he.

¹⁷ Taico Zisu cawh pai a saidungpaw a buh sah he ka, abui lukhu cawtah ahling tei phiapaw lukhu khah a lu letah a khusah he.

¹⁸ Taico, “Juda cawngsaw aa siangpahrang cawh palawngpali tah ung seh,” tatah a y he.

¹⁹ A lu letah sungbasih tah ato le ato tah tuh he ka, aa ci tah chawh he ka, aa khuh panai he ka, aa beh pakhei.

²⁰ Taico aa pasi aa pasa khy taitah pai a pasuapaw a saidungpaw cawh pahu pah he ka, Ama a chaichi khah aa hrei sah kaw he. Taico khraws letah khaipai pawtah aa sei khui.

*Khraws letah khaipainah**(Mt 27:31-44; Luk 23:27-43; Jh 19:17-27)*

²¹ Taico, khuatei lang tah khua a va tlawngpaw Sairin khuapaw, Alekzandar le Rufa aa paw Simon cawh langpui letah tle he ka, khraws khah hringhrang tah aa puh sah. ²² Zisu cawh Galgotha, (A silang cawh lurus hming tahnah a cang,) aa tahpaw hminghmaw lang aa seikhui. ²³ Taico, mura sii khatah pahlawhpaw misur zu khah pei he ka, canghrasala Zisu tah ding du be. ²⁴ Taico, khraws leco aa khaipai. A chaichi cawh a chaichy he ka, pakheh cy tah ze heh maw kaa ting a tah hni du tah basung aa phe.

²⁵ Aa khaipainah cai cawh mong suimehlang pakua a cang. ²⁶ Sua aa phosahnah bia, ca tei aa ciapaw cawh, “JUDA CAWNGSAW AA SIANGPAHRANG A CANG,” tah heh a cang. ²⁷ Ama khatah damia pahning, a cacang lang letah pakheh, a cavui lang letah pakheh aa khaipai hrah he. ²⁸ Capathai tah, “Ama cawh mehsua sahlo khatah reipai a cang hrah,”✧ a tahpaw bia cawh a tling.* ²⁹ A seithipaw sahlo takhei aa lu cathingso he ka, naisui hmo kheh, “Behnah ing chehthlah tah ningthung letah a sah kaw khypaw cang bei ceh maw? ³⁰ Khraws taikhei za cung thlah la, nama le nama a pachah ca!” tatah aa pasi aa pasa.

³¹ Ma hraco tlangbui macang sahlo le phung-bia cawngpahtu sahlo taco, pasipasa hrah he ka, “Cawngsaw ahringpaw cawh pachah he ka, canghrasala ama le ama cawh a pachah khy

✧ 15:28 Isai 53:12 * 15:28 Kih cia thaikheh leco cai 28 heh ung be.

beh! ³² Israel Siangpahrang Khri cawh atoheh kaa mehmuh lehei khraws taikhei cungthlah tua, maco ca hmuh a peh ka, kaa ca zing a,” tatah aa tah. Ama khatei aa khaipai hrah paw he takhei naisuinah bia a hlupui khei aa tah hrah.

Zisu thihnah

(Mt 27:45-56; Luk 23:44-49; Jh 19:28-30)

³³ Ningching suimehlang hluihning hrong taitah zailang suimehlang pathung tai raang pungpaluh letah muinah a tlung. ³⁴ Zailang suimehlang pathung leco Zisu cawh, “ Eloi, Eloi, lama sabathani?”[☆] tatah a thangpui tah a y. A silang cawh, “Ka Khazing, ka Khazing, zecawtamaw na pa seisai?” tahnah a cang.

³⁵ Ma letei a daw thlang paw mehthaikheh tah ma cawh aa thui tihtah, “Nawthlia tua, Elija a y!” tatah aa tah.

³⁶ Taico cawngsaw pakheh va sai ka, span cawh misur zu a thobahlapaw letah nong ka, rahtlong letah patai ka, Zisu cawh ding pawtah a hlai. “Ama teitah ung cong tua seh, Ama lahthlah pawtah Elija cawh a vong maw, vong ly mingtua he peh,” tatah a tah.

³⁷ Taico Zisu cawh a thangpui tah y ka, a thi.

³⁸ Behnah ing letei pai aa pazypaw cawh a dong taitah a hrang tai pehning tah a hriachy. ³⁹ A hme letei a daw thlang paw raekeh zakheh buipaw tah Zisu a ypaw le zekhatamaw a thih tah paw khah a hmuh tihtah, “Ma cawngsaw heh Khazing Sawcapaw a cang hrah ring thlang,” tatah a tah.

⁴⁰ Canu thaikhehpaw tah langpa tah aa cai thlang. Aa hrong leco, Mari Makdalin, a sui vypaw

[☆] 15:34 Hlaw 22:1

Jeims le Josef aa no Mari le Salomi a ung hrah he. ⁴¹ Ma canu sahlo cawh Zisu, Galili raang letah a ungning tei a zuilaipaw le, a byhiapaw a tuapahpaw sahlo khah a cang he. Ama khatah Jerusalem lang a vong hrahpaw canu a hlupui zong a ung hrah he.

Zisu aa phung

(Mt 27:57-61; Luk 23:50-56; Jh 19:38-42)

⁴² Ma ning cawh Pachiapaningnah Ning, Sabat ning hlai teipaw ning khah a cang. Zailang a va phah tihtah, ⁴³ Arimathea khuapaw, khongsil chung letah aa cizaw ngeteipaw Josef cawh Khaz-ing painah raang a va tlung lepaw hnabeisuinah a hnui ngeteipaw cang ka, ama cawh Pilat khatah raechah ngetei tah a vaw ka, Zisu rawh cawh a va hae. ⁴⁴ Zisu cawh a thi thah tahpaw Pilat tah a thui tihtah a ning a ang ngetei. Raekeh zakheh buipaw khah y ka, “A thi thah maw?” tatah a hae. ⁴⁵ “Zisu cawh a thi thah,” tatah raekeh buipaw tei a reipaw khah a thui tihtah Zisu rawh cawh Josef khah a peh. ⁴⁶ Taico Josef tah paithladih a naipaw co ka, a rawh cawh lawthlah ka, paithladih co pahlong ka, alung kho aa ruipaw thlai leco a isah. Taico alung a laipaw pui khah thlai kaw lekhei a palia. ⁴⁷ Mari Makdalin le Josef a no Mari tah Zisu aa phungnahpaw hming cawh aa hmuh.

16

Thokawnah

(Mt 28:1-10, 16-20; Luk 24:1-53; Jh 20:1-23)

¹ Sabat ning a chang tihtah Mari Makdalin le, Jeims a no Mari le, Salomi taco Zisu rawh thu rua-paw sathy ringthopaw khah aa cawh. ² Zaa kheh letei ning hmetaw caipaw mong lang ning a chua khy taitah thlai lang cawh a vaw he. ³ Langpui leco, pakheh le pakheh khah, “Ahomaw thlaikha a ma hongpah a?” tatah a tah he.

⁴ Canghrasala thlai cawh ming he ka, thlaikha alung alaipaw pui cawh a hneihly thah. ⁵ Thlai chunglang cawh a nae he ka, satlepaw pakheh cawh angkilai arangpaw a hrei ka, cacang lang chang letah a ty thlangpaw khah hmuh he ka, a pahly ngetei he.

⁶ Ma satlepaw taco, “Naa thlawzawng kheh seh, khraws letei aa khaipaipaw Nazaret Zisu khah naa hui tahpaw ka hni. A tho kaw thah! Ma lehei ung khawh be. Aa i sahnahpaw heh mingtua o. ⁷ Canghrasala va sei la, a hningzuitu sahlo le Piter khah, ‘Ama tah a ca chingpaw he hrakhei naa hme lang khei Galili raang lang sei ka, ma leco naa hmuh tae a,’ a tah tatah va ching o,” tatah a tah.

⁸ Canu sahlo cawh thlawzawng hmotah le ci hmotah thlai taico rairang teitah chuhthlah he ka, a sai he. Aa ci tu rawng tah khei ahohmai bia a ching bei he.*

⁹ Zaa kheh letei ning hmetaw caipaw, a thokaw ning mongdi tah Zisu cawh a chung taitei khachia sangsarih a papiapah no Mari Makdalin khakhei a paly taw. ¹⁰ Mari Makdalin taco Zisu khatei a za ungpaw sahlo, mangchia sa tei, a cah leimeipaw sahlo khaco va sei ka, a thuisah he. ¹¹ “Zisu cawh

* **16:8** Kih cia thaikheh leco cai 9-20 heh ung be.

hring thlang ka, ka hmuh,” tatah a chingpaw he khah aa thui tihtah zing bei he.

¹² Ma khy taico Zisu cawh a hningzuitu taitah pahning khatah khuatei lang aa tlawngnah lekhei a hmuisang a macangpaw tah a paly. ¹³ Ma tlaw cawh va kawkaw he ka, a tangpaw aa vesaw sahlo khah aa ching he, canghrasala zing hlui hrah bei he.

¹⁴ Ahning cai letah Zisu cawh a hningzuitu hluikheh sahlo batui aa e leimeining takhei a va paly. Zingnah aa hnuilynah cawtah le a tho kaw khy taitei a hmuhpaw sahlo tei aa chingpaw he zing pawtah aa lung a khong tu cawtah khei a chinghring he.

¹⁵ Aa hai letah, “Khazaw pungpaluh letah sei la, tuapaw hming vytei khatah thawngchawbia heh va rei my lo. ¹⁶ Aho aa cang zong tah zing katei, baptisma a cangpaw maikaw cawh pachah a cang he a. Canghrasala a zing lypaw maikaw cawh sua phosah a cang he a. ¹⁷ Ma ningang chuipaw paching pakhanah tahei a zingpaw sahlo cawh a zui longmang he a. Kama ka ming tah khachia aa papia a, reithapaw zong tah aa rei a. ¹⁸ Pari zong aa kia tah tle he ka, thihnah si zong aa ding hrah hmai tah zekhatahmai a tua a bei he. A dang lypaw cung letah aa kih zong pahnia a he ka, a dang he a,” a tah he.

¹⁹ Taico Abuipaw Zisu cawh aaning khatah bia a rei khy taitah vaicung lang lahchy cang ka, Khazing cacang lang letah a ty. ²⁰ Taico, a hningzuitu sahlo cawh sei he ka, kawkehnah letah thawngchawbia cawh aa reilai. Abuipaw tah aaning cawh hrekhui he ka, aaning a zuilaipaw he

ningang chuipaw paching pakhanah takhei aa bia
sahlo cawh a pacysah.

Biahraï Tha, Zyphe rei New Testament in Chin, Zyphe

copyright © 2010 Wycliffe Bible Translators, Inc.

Language: Chin, Zyphe

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445828

The New Testament

in Chin, Zyphe

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

3ab5e66d-afb3-54e4-aefd-60f99c2a3ee9